

ASO GAFUA, 31 IANUARI 2022

Na nofoia e le Fofoga Fetalai le Nofoa i le itula e 9.26 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

E tatou te le tau sufiina faa-afualoma le ataata gafoa o le taeao, leaga e mamana le alofa o le Atua e pale ai le soifua ma le ola. Ae afai foi tatou te faitau galu, e le tau faapoapoina le malaga a le maaosofia o le tai fanae. O le agaga faafetai e pei ona siitia ai le tatou taulaga osi i lenei taeao, ia foi pea le viiga e le aunoa i lo tatou Atua, ona o Lona alofa ma Lona agalelei ua tatou avafatafata ai i luma o le nuu ae le o tua o le nuu.

O lea ou te ofo alofa ma faatalofa atu ai i le paia o le Palemene i lenei taeao fou i le afio o lau Afioga i le Tamaitai Palemia, lau Afioga i le Sui Palemia ma le Aiga Kapeneta, faapea foi Afioga i Minisita Lagolago.

E faafeiloai atu foi i lea Itu o le Maota i le afio o lau Afioga i le Taitai o le Itu Agai, tainane lau Afioga i le Sui Taitai ma le mamalu o lena Itu ma le mamalu o sui usufono o le Palemene, taeao manuia, malo le lagi e mama.

I le faafofoga tapuai mai a le Afioga i Le Ao Mamalu o le Malo ma le Masiofo, lau Afioga i le Sui Tofia ma lou faletua, lau Afioga i le Faamasino Sili ma lou faletua ma le mamalu o le Faamasinoga. Aemaise o Samoa i ou tulaga faalupelupeina, tainane auaua faauuina o le talalelei. Malo le soifua manuia, malo le lagi e mama.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a lo tatou Malo, malo le soifua manuia, malo le tauatai. Viia le Alii i mea silisili ua Ia faia mo i tatou. E ui i aafiaga o le Koviti-19 ua aafia ai nisi o le atunuu, peitai, ua tatou molimauiina ma le loto faafetai e le o tuulafoaiina lava si o tatou atunuu e le Atua. O lo o malutia pea le soifua ma le ola o le loaloa o le atunuu i Ona aao faamalolo, o Ia lava o le moli e mu ao tatou te saili manu i ai i Lona malamalama. Ia agalelei le Atua i le usugafono a le tatou Maota i lenei taeao. Manuia foi le tapuai mai a Samoa i le tatou alofaiva.

ISI FAASILASILAGA A LE FOFOGA FETALAI

FOFOGA FETALAI: O le tiute lava ia o le Nofoa, o le faatonutonu folau o tulaga sagatonu o le tatou galuega aemaise o le tausiga o tulaga mamalu ma le aloaia o lenei Fono Aoaio Faitulafono. Ua molimauina e le Nofoa i luga o faasalalauaga nisi o mataupu tutoa ua faalauiloa faalauaitele sese e le sui usufono mo Faleata Nu.3. Ua ou manatu, ua tatau ona fai se faaiuga e taofia ai le toe tulai mai o nei ituaiga faiga leaga ua taumamaina ai le mamalu o le Palemene.

O a tatou Tulafono Tumau, o aiaiga na faamaonia e le Fono Aoaio Faitulafono ma faataatia e taiala ai le faiga o tatou galuega mo faamoemoega ina ia tausia le mamalu ma le aloaia o le Fonousu a le atunuu, ua taoto ai foi ma ona aulape mo le puipuia o le solia o Tulafono Tumau. E le o muta pea le tuitui atu ma le faamanatu atu a le Nofoa, peitai, ua ou molimauina, e i ai lava sui usufono latou te le amanaiaina le Nofoa. Ou te toe faailoa atu, e le faatagaina ona saunoa se sui usufono i ni mataupu o lo o i luma o le Faamasinoga leaga e ono faaleagaina ai aiatatau a vaega uma o lo o aafia i ia mataupu. E le tatau foi ona faia ni faasalalauaga faalauaitele e fesootai i mataupu o tatou taualumaga ua tuuaia sese ai le Fofoga Fetalai ma a tatou faaiuga sa fai. O se vaega o faasalalauaga ua faasalalau faalauaitele e le sui usufono mamalu:

Muamua, ua tuuaia sese ai le Fofoga Fetalai i le mataupu i sui usufono faaopoopo. O lenei mataupu o lo o i luma o le Faamasinoga. E pei ona ou taua, e tapu i a tatou Tulafono Tumau ona tautalagia se mataupu o lo o faatali se iuga faa-Faamasinoga. O lou faanoanoaga, o le tuuaia sese o le Nofoa ma ua taitaiseseina atu ai foi ma le faafofoga a le atunuu ma le lalolagi atoa.

Lua, ua uma ona faataatia le Lipoti o le Suesuega a le Ofisa o le Fono Faitulafono e faatatau i le Mataupu na laga e le Loia Sili talu ai, i Teuteuga o le Faavae 2020 ma le Tulafono o Fanua ma Suafa 2020. Sa ou folasia manino i totonu o le Maota lenei i le aso 18 o Ianuari 2022 le mafuaaga taua o lo o tausaili ai se fofo o lenei faafitauli ona ua le mautonu le atunuu po o fea tonu o taoto ai le sao o ia Tulafono. Na pau lava lea o mafuaaga na aumai ai le Lipoti o le Suesuega lea i le Maota. Peitai, o faasalalauaga sese faalauaitele e le sui usufono ua faaoloataua ai le atunuu e faapea, o se gaoioiga na faia e le Vaega Faaupufai a le FAST ina ia tuuaia ai le HRPP. Ua ese le faamalamalamaga na ou folasia na mafua ai ona aumai le Lipoti i le Palemene, ese mamao ma faamatalaga sese ua faasalalau e le sui usufono. O se uiga faalemigao lea gaoioiga. Ua uma foi ona fai le faaiuga a le Nofoa, e le mafai ona talanoaina lenei mataupu seia oo i le taimi o le a soalaupule ai. Ia manatua foi, o faaiuga a le Nofoa e mausali. O ia faiga ua atagia ai le amanaia o le pule a le Nofoa. E le o le tagata a o le Nofoa, ua solia ai aiaiga o Tulafono Tumau, ma o se uiga faalemigao. E le mama i le Nofoa le mataupu ua tulai mai ona ua solia ai le Tulafono Tumau a le Palemene,

aemaise o se uiga faalemigao. E le tatau foi i se sui usufono ua tau Sinia i le Maota ona tausolomua ni uiga faapea, o ni uiga e le maua ai se filemu ma se fealofani o le saofaiga mamalu a le Palemene o le atunuu. Ua tausolomua i sui usufono o le tatou Maota ona faasalalau faamatalaga sese ona tupu ai lea o le loto mataua i le atunuu. Ua masaa le ipuvai, a faapefea ona toe saili mai? E le maua ai se maopoopoga o le Palemene.

Ua i ai le faaiuga a le Nofoa, ua tatau ona uia aulape o tatou Tulafono Tumau ma ua lapataia le paia o le Palemene, e le tatau ona toe tulai mai ni faiga faapea leaga e taufaatauvaaina ai le aloaia o le Palemene. Ia o tatou manumanu i le upega, leaga o la e silasila mai le atunuu. O le tatou saofaiga, tulou, e fausia e le tofa ma le utaga fetalai. O moomooga na o le Nofoa. O le manaoga foi lena o le atunuu na filifilia mai i tatou.

Ou te matau atu o lea e tau tulai mai le Afioga i le Minisita o Fesootaiga, ma Faamatalaga Tekonolosi po o le Minisita o le Fono Aoao Faitulafono. Tulai mai lau Afioga i le Minisita, Honourable Toelupe.

Afioga Hon TOELUPE POUMULINUKU ONESEMO (Minisita mo Fesootaiga ma Faamatalaga Tekonolosi): Faafetai. Lau Afioga i le Fofoga Fetalai, e faalogologo lava ma le manino i le saunoaga a lau Afioga i lenei taeao, ma ua ese foi lagona, aemaise o le ogaoga o le solia o le tatou Tulafono Tumau. Talofa e i lau Afioga, ua le amanaia le Pule o le Nofoa o le Palemene o le atunuu.

Ou te manatu o le ala lea ua ou tulai ai e faatu le lafo e faapea, *E tusa ai ma Tulafono Tumau 65(4), Tulafono Tumau 92 o lona vaega (4), ina ia tuueseina le sui usufono mo Faleata 3 mai galuega a le Fono Aoao Faitulafono mo le taimi e 24 itula, e amata atu i le taimi o le lafo ua ou faatuina atu.*

Ma le faaaloalo tele.

Faaluaina e le Minisita mo Pisinisi, Alamanuia ma Leipa.

Tofa Lealailepule Rimoni Aiafi (Faleata 3): Lau Afioga i le Fofoga Fetalai...

FOFOGA FETALAI: O lea ua faatu mai le lafo ma ua faaluaina. E tusa ai ma aiaiga o tatou Tulafono Tumau 92(4) e tusa o le lafo, e leai se lafo toe teuteu po o se fefaaaliaiga o taofi e faatagaina i ai.

Na faamaonia le lafo ma tulai ai le sui usufono mo Faleata 3 ua tuueseina mai galuega a le Fono Aoao Faitulafono mo le taimi e 24 itula.

Tofa Lealailepule Rimoni Aiafi: Lau Afioga i le Fofoga Fetalai, pe maua sina avanoa ona ou alu ai lea i le matou aiga. Ma le faaaloalo lava.

FOFOGA FETALAI: E leai, e faamalulu atu i lau Afioga i le sui usufono mamalu e le o i ai se avanoa e tusa ai ma tatou Tulafono Tumau.

Tofa Lealailepule Rimoni Aiafi: E leai se avanoa? Ua lelei, o le a ou alu i fafo e fai ai lau interview i le TV.

FOFOGA FETALAI: Ia, o lea ua manumalo le Ioe. E tusa ai o le lafo ua faamaonia, o le a tuueseina le sui usufono mo Faleata 3 mai galuega a le tatou Maota mai le taimi nei mo le umi e 24 itula. E le faatagaina foi le sui usufono ona toe solia le faataamilosaga i fafo o le Maota seia maea le taimi na tuueseina ai. Alu filemu i fafo.

POLOAIGA MO FAALAVELAVE FAAFUASEI

FOFOGA FETALAI: E faasilasila atu i le mamalu o le Palemene ua ou taulimaina nei Teuteuga o Poloaiga mo Faalavelave Faafuasei mo le Koviti-19, e pei ona faamaonia e Lana Afioga e Le Ao o le Malo, Tuimalealiifano Vaaleto'a Sualauvi II, i luga o le Fautuaga a le Kapeneta e pei ona taua i lalo, mo le faataatiaina i le Laulau a Fono.

1. Poloaiga o Faalavelave Tutupu Faafuasei Numera 66, na amata faamamaluina i le aso 30 Ianuari 2022.

TULAFONO TAU FAAOFI O LE FAATATAUINA O TUPE FAAOPOPO (NU.1) 2021/2022 – felafolafoaiga faaauau i luga o le faitauga faalua – Aso 5

FOFOGA FETALAI: E tolopo felafolafoaiga i le Aso Faraile o le vaiaso na tea nei ua maea ona saunoa le sui usufono mo Vaimauga 3.

Ia, o le avanoa lenei mo se isi foi sui usufono mamalu e fia sausaunoa aua le tatou Tulafono o le Tala Faatatau Faaopoopo o le Tupe.

Ia, e matau atu o lea ua tulai mai le Afioga i le Taitai o le Itu Agai ina ia i ai sina ana faaopoopoga i le tatou Tala Faatatau Faaopoopo o le Tupe, o Ia foi o le Komiti o le Sui Taitaifono ona faasolo atu ai pea lea o le tatou folasaga. Ma le agaga faaaloalo.

Se i tulai mai lau Afioga i le Taitai o le Itu Agai.

Susuga Hon TUILAIPA Dr. SAILELE MALIELEGAOI (Taitai o le Itu Agai): Ou te tulai atu ma le agaga faaaloalo e momoli atu le faamalo i lau Afioga i le Fofoga Fetalai, e tusa ai ma le taulaga siitia tatou te auai uma

e faafetaia ai lo tatou Matai Sili i le taitaiga mai o le Maota nei i le soifua laulelei e faaauau a tatou galuega i lenei taeao fou.

Faamalo foi i lou lavapapale, faamalo i lau Afioga i le Tamaitai Palemia ma le Sui Palemia ma lo outou auvaa le Kapeneta ma Minisita Lagolago.

E faapea foi le mamalu o le Maota nei. E faapitoa le faamalo i a outou Afioga i Minisita Lagolago faapea foi ma i latou o lea ua faatoa amata a outou Paeaiga i a outou saunoaga. O le agai atu i le faaiuga o lenei Paeaiga, ia, ua faaopoopoina pea le malamalama, aemaise le lavelave o galuega faale-Malo, i le auai i Komiti, o le a feagai ai ma Ofisa Sili o Pulega o Matagaluega aua latou matafaioi tauave.

E faafetai foi i le tapuaiga a Lana Afioga Mamalu i Le Ao o le tatou Malo e faapea foi le Sui Tofia ma le mamalu o le tapuaiga i Aiga ma latou Tama, faapea foi le tapuaiga a Tumua ma Pule, Ituau ma Alataua, Aiga i le Tai ma le Vaa o Fonoti.

E faamalo foi i le tapuaiga i le tatou Faamasinoga, le Faamasino Sili ma le vasega o alii ma tamaitai Faamasino. Ae matua lava le tuu i auauna o le talalelei ma le latou foi faanonogamanu.

E le mafai ona le oo upu i le tapuaiga a o tatou uso a Malo, Tutuila ma Manua, aua le faafogafoga mai foi o le Kovana Sili ma lana Kapeneta, le Faamasinoga aemaise le Fofoga Fetalai, ia ma le Peresetene ma sui o Maota e lua Faitulafono. O paia lava ia e faasino i Falelima i Sasae ma Falelima i Sisifo. O le paia aua Sua ma le Vaifanua, Fofu ma Aitulagi, Ituau ma Alataua, faapea foi Saole ma le Launiu na Saelua. Faatui o le Motu, Tootoo o le Faleula ma upu i le Manuatele. O paia atoa ia o Samoa e le mafai ona le oooo i ai upu ona o Samoa lava ia e tasi, e ui lava ina eseese a tatou faigamalo, ae o le isi lea faitotoa e ulufale atu ai o tatou tagata i le Malo tele o Amerika.

Ae o le faatumauiina foi o le latou foi faigamalo, o i e tafe mai ai pea le manuia mo latou ma agai mai ai i Samoa nei. E matautia le tulaga ua oo i ai a tatou faigamalo e lua, ona o mea na tutupu i aso ua tuanai, ae i ai lava itu lelei o le faataua pea o tatou faigauo, o lea foi e maua mai ai manuia o le tatou Malo e auala i le tele o fesoasoani latou te aumai, e fesoasoani i le tatou taumafaiga o lo o fai nei e tau fofu ai faamai o lo o afaina ai si o tatou atunuu.

E momoli foi le faamalo i le tapuaiga a Ofisa Sili o Pulega, o i latou ia o lo o i ai e le gata o le poto faapitoa, a o le poto masani ma le agavaa. E toatele tagata ua maualuluga faailoga, ae le o i ai le poto masani, e le o i ai le agavaa i le tulaga o auaunaga. Ma o le poto masani ma le agavaa, pe a fua i le tele o tausaga o tautuaina le tatou Malo. O le ala foi lena na fai ai le faaiuga e silia pe a ma le 36 tausaga talu ai. I le tausaga e 1984, na fai ai le iuga a le tatou Malo ina ia aiaia ai le auai mai o Ofisa Sili o Pulega o Matagaluega, e le gata ina aumai le latou fesoasoani i Minisita i taimi e manaomia ai, ae o lima taumatau ia o le Kapeneta latou te faamaumauina finagalo o Taitai o le atunuu, aua le faatinoina i le agai atu i le lumanai ma tuu i totonu o le Tala

o le Tupe. E le mafai foi ona maua atoa e Minisita o le Kapeneta manaoga o le Maota nei, ma e le o toe i ai nisi o aisili, o lea ua atoa i i Taitai o Samoa. E ao ai ona faafogafoga i latou o lo o i ai le potu masani latou te faatinoina fuafuaga ua sausaunoa i ai le mamalu o le tatou Maota nei i a latou saunoaga faalauaitele.

Ou te avefa foi le avanoa lenei e momoli ai le faamalo ma le faafetai ia i latou foi sa asiasi atu i si ou foi faaletonu na ou aafia ai. E le masani ai, ae o uiga ia o atunuu nei taumafanafana e tele naunau le siama e ola i le tino, e te te i lava ua aafia oe i le siama, ma o le mea lena na tupu ia te au. Faafetai ia i latou foi na oo atu o le tatou Maota nei, ia, ma i latou foi sa avatu a latou feau faamaise, aemaise foi talosaga siitia. E le mafai ona ou tolaulauina atu i latou uma, ae lua lava sui usufono na oo atu matou feiloai, ae pau tonu atu lava i le taimi e tasi. O le sui usufono mo Faasaleleaga 4, ia faapea foi le Minisita o Faatoaga, e oo faatasi atu lava lau Afioga i le Fofoga Fetalai. Ia, oo atu loa faatalofa, talie. Ia ma ou faapea mai loa, “sole, o oulua tonu lava ia na ou mai ai, ina ia aumaia oulua lua te faatalofa i ou luma ma faaleleia le lua misa. O le mea la lea, tuu loa lua fesuaaiga na e fai, o le tausaga fou lea ua tatou i ai.” Ia, ae na o le talie lava o le aualii nei. Ia ona ou faapea atu loa lea, “ia, o uiga ia o tama tuai o le HRPP, o le a lava le fetauai, ae feiloai loa, ia na o le talie lava ma sua. Ia ma ia lua alolofa, aua ne i lua toe misa i te i foi ua ou toe mai, ina ia toe aumai ai foi oulua i ou luma.” Ia o le mea la lea, faamalo. Ua ou taua faapitoa lava le toalua lea, ona e pele tele ia te au le toalua lea.

Lau Afioga i le Fofoga Fetalai, o lea ua taoto le Lipoti a le Komiti o Tupe ma o se taimi ona saunoa lea o le Taitaifono. O le matou Taitaifono foi, o le matua siamu lava i le mataupu o le Tala Faatatau Faaopoopo o le Tupe, ia ma o lea tatou te malamalama uma, o le Tala Faaopoopo, o nai seleni e manaomia e faaauau ai galuega o lo o totoe, ma o lea foi tatou te i ai i le taimi ua amata ai ona tapena le isi Tala Autu o le Tupe. Ia, lau Afioga i le Taitaifono o le Komiti o Tupe, ia o ou mama na, i le taimi e kiliva ai lau Lipoti.

Lau Afioga i le Fofoga Fetalai, e 3 mala tetele ia e faafeagai ma le lalolagi, o le Koviti-19, tamaoaiga ma le suiga o le tau. O mala tetele foi na o lea e feagai ma Samoa, ae ua sili atu ona matuia mo Samoa ona o lea ua oo mai siama ia sa tatou taumafai e taofiofi. Ma e moomia ai le galulue faatasi o le Malo. O le tusi lea o le Faavae o lo o aumaia ai e le Vaega 2 aiatatau faavae, faamatalaga o le Malo i lenei vaega, seiavagana ua ese le aano e manaomia. O le Malo, e aafia ai Le Ao o le Malo, le Kapeneta, le Palemene ma Pulega uma lava tau le atunuu ma isi pulega ua faatuina e tusa ai ma so o se Tulafono. O tatou uma la o le Malo lau Afioga i le Fofoga Fetalai, e aafia ai ma lenei Vaega Faaupufai, tatou te galulue faatasi ai mo le faaleleia o mea nei. E leaga a sau lava le mai, e le iloa e le mai ona tuueseese tagata, e aafia uma lava tatou, aafia uma ai ma a tatou fanau. O luitau la nei e matua

manaomia ai le galulue faatasi o vaega uma o le Malo i lena Itu ma lenei Itu. Ma e le lelei foi i le faafofoga mai o Samoa o tatou fetuiai i inei i le Palemene a o le tatou galuega lea e tataua ona fai, o le tatou tilotilo i auala eseese uma e taumafai e fofo ai faafitauli ma mala nei ua feagai ma i tatou. E le mama luitau ia e faamalumalu mai e aafia ai a tatou fanau e pele i loto ma agaga. Ua uma le taimi o tatou taaloga faapolokiki, o lea ua tatou i ai i le taimi o le nation building o le faufau o le tatou Malo.

O le lagolago a le Vaega Faaupufai lenei o le HRPP, e momoli atu i fautuaga. E faamalulu atu i lau Afioga i le Fofoga Fetalai faapea foi le Taitai o le Malo, le Taitai o le Kapeneta, pe a faafogafoga mai ua fai si malosi o le avatuga o le tuualalo po o le fautuaga. A o upu a le Palemene lenei lau Afioga i le Fofoga Fetalai, e le milia faauu upu o le Palemene lenei. Ae o upu foi masani e pitoa ia Faleata, “E tetele lava i pesega ae matua lava i le oo.” E ono faigata ai foi ona talia se fautuaga e avatu i inei, i se leo malosi e avatu ai. Ae o totonu o le malosi o le fautuaga o lo o molimoli atu ai le alofa molipo. Ua tele nai tuualalo a le Vaega lenei ua fai, ae pau lena o le mea e napa ai matou nei, e na o le fautuaga. Ae o le malosi atoatoa e faatino ai, o lena ua i ina i lau afioga i le Palemia, le Kapeneta ma lena Itu o le tatou Maota. E manatu ua tele foi upu ma fautuaga, ae se i avatu ia ni nai mataupu laiti ia, e tusa ai foi ma lau vaai faa-taitai o lenei foi Vaega.

O le faafitauli tele lava o le a faafeagai ma i tatou, aemaise o le faatinoina o galuega fuafua e le Kapeneta, o le tulaga tau tupe. E le mafai, le mafai ona alofia lea tulaga, e matua manomia seleni, e faatino ai, ma auala e ao ai seleni ia, aua galuega fai. O le ala foi lena sa avatu ai pea ni nai motugaafa i lenei Itu, i vaega eseese e mafai ona maua ai seleni.

Sa fuafua Tulafono, po o ai lava le Malo e tulai mai i le foe, e aveese ai ia manatu na fai e le Faigamalo lenei, ina ia manuia ai le Faigamalo lenei. E tele lava mea na tutupu i aso ua tuanai, e fai e le isi Faigamalo fuafuaga, ae sau le isi Malo faaauau ma aeae ai. O mea faapena e masani ai Malo faatemokarasi. O le lava o tupe, e mafai ona tua i ai le Malo aemaise le faatinoina o a outou foi vaega o la outou platform sa fai i le atunuu. A o i, e mafai ai ona faatino.

I le taimi lenei, o lo o i ai le tulaga popole i lo tatou atunuu ona o lea ua oo mai le faamai, aemaise siama ia. O lea foi tatou te matamata i le faiautago foi e isi Malo o togafitiga. E tuu mai i lo tatou Malo, e le o lava fomai, e gafatia se tulaga e pipisi ai le faamai lenei.

Sa aumai lava foi i le matou taimi, o le ala foi lea na malolosi ai faaiuga fai. O le uiga o le faamatalaga, o se mea o lo o manaomia gofie e o tatou tagata le vave, ona faalauaite mai faaiuga fai a lo tatou Malo.

E i ai le taofi, i le tele o tiute o lo o feagai ma le Palemia, a fai e le o avanoa le Palemia, e mafai lava ona delegate le NEOC, e aumai e latou le faamalamalama aua o lo o malamalama lelei latou, ia latou mea o lo o fai.

Ae manatua foi, e leai se saolotoga e fai e le NEOC e fai ai e i latou se faasalalauga e ese mai ai mai le faaiuga a le Kapeneta. O lona uiga, o le a le latou fautuaga e aumai i le Kapeneta, tuumuli ona soalaupule lea o le Kapeneta, o le a le latou iuga e fai, e mau i lalo o faaiuga a le Kapeneta, po o le pepa FK ma le fuainumera. A fai foi la e faasalalau mai e le NEOC, e mulimuli lava i faaiuga o mataupu ua pasia e le Kapeneta, e le mafai, le mafai ona au ese ai.

O le ala foi lea e manatu ai i nisi iuga foi a le Kapeneta, e lelei lava le aumai pea e le Taitai o le Malo. Ona a aumai e le Taitai o le Malo, e tele le talitonuga o lea sa soalaupule uma e le Kapeneta. Ae a fai e aumai e le Palemia, ae fai foi ni faasalalauga a isi Minisita, e ono felautoai ma le faaaliga a le Palemia, o i ina tonu lava e tupu ai le felautoai o le tatou atunuu.

O le tuualalo, e tuu pea i le Palemia, po o se isi foi e delegate i ai e le Palemia lea tulaga, o le aumaiga i le tatou atunuu o faaiuga fai.

Sa avatu muamua e le Vaega lenei, le Sui Taitai se tuualalo, e taua tele, ona o mea ia o la foi e fai e isi atunuu. I le tulaga e tatau ona i ai ni na i nofoaga, pe 3 pe 4 i totonu o le taulaga. E afe gofie e o tatou tagata na i lo le tau o i le falemai. Ae fai i tai nei i le taulaga, e mafai ai ona o atu tagata e siaki pe ua maua pe leai. Ia na o se tuualalo lava e faataatia atu i tafatafa o le Malo. E tasi le leo, e faigofie ai ona maua e lo tatou atunuu le agaga mafanafana, o lea ua alu atu le faaiuga a le Malo.

Lau Afioga i le Fofoga Fetalai, e taua tele le mea lea sa ou taua, o faiga lava ia Faavae a Malo o le Taupulega, e sui Malo ae le suia i latou e auuuna, po o ai lava le Malo e o atu, o lo o lava foi lo latou silafia i le tele o mataupu. E le gata i totonu o le lotoifale, ae faapea foi le tulaga faa-o-Malo, lava lo latou tomai. E i ai le taofi lau Afioga le Fofoga Fetalai, e le mafai e le inisinia ona faia ni galuega a se fomai, e le mafai. O le talitonuga o le Vaega lenei, a oo loa i mea tau tupe, tapa pea i latou o lo o i ai le tomai tau tupe, e fautuaina le Malo.

I le taua ai o le matupu lea, ua ou toe valuvalusia ai le aa o le fau, le tulaga lea se i toe tilotilo lava i le tatou vaalele. E i ai iuga sa fai e le Kapeneta lenei, e taua tele mo le toe iloiloia, o le toe restructure o le tatou vaalele e fofu ai le mataupu lea e avea pea ma faafefefe ia i latou, o i ai pea ni atugaluega i le vaalele. A o le vaalele lenei, tatou te le toe maua ni aiaiga maoae, i le taugofie o le lisi, ona sa fai tonu i le taimi ua tau le amanaia, ua le moomia e tagata vaalelei nei o le BOEING. O lea la, a o le vaa lava la lea e sefe, e le i oo i le vaalele lea na tupu ai faalavelave. Na ta sui uma ai systems o le vaalele. O le agaga, se i toe tilotilo lava i ai i le tulaga lea. O le taua o le itu lea, a mulimuli i fautuaga e 4 pe 5 na sa fai ai le iuga. E mafai lava ona fofu alamea e le vaalele, ia tupe e tatau ona maua e totogi ai le lisi. Aisea? Vaai i le tele o nei uta e faaoga ai le vaalele a Niu Sila, Fiti. O tupe uma ia ua alu i vaalele o Niu Sila, manu e faaoga lelei e tatou, e le vaalele, e totogi ai lisi, aemaise o le tulaga i spin offs ma le multiplier effect. O tupe e maua mai i le vaalele

e masaa atu i le tele o pisinisi i totonu o le atunuu. E le muta ai na o faletalimalo, ae tele le fesoasoani i faleoloa uma lava e taulia ai a latou oloa, o faleaiga o pisinisi tau taavale, e tele le masaa atu o le fesoasoani lenei ia i latou ia.

E le o mafai ona oooo i ai ia le manatu o le tagata e le malamalama i mea tau tupe. A o aiaiga ia sa faataoto e le faigamalo lenei, o aiaiga taua tele aemaise le tulaga o le tulaga o le toe tilotilo i le restructure ina, e faigofie lava ona restructure ia le vaalele i le tulaga o le capital. I le tulaga o le toe silasila i le toe faatulagaga o le pulega. I le itu e aafia ai le tilotilo i le avea o le vaalele ma Public Company ona e tele latou i tua o pisinisi, e manao e faatau a latou sea i totonu o le Kamupani vaalele lea. Ma le tulaga taua lava lea, o le tilotilo i le Pulega, pe le o le taimi lea e tataua ona toe fetuunai ai ia Pulega.

O i i le vaalele, e faalagolago uma i ai ia tatou atinae o turisi, ma atinae uma lava e fesootai ma turisi. Ae o le le aumaia o le vaalele lenei, o le a te i lava ua aafia ai lo tatou atunuu i le totogi o tupe, a o tupe e mafai lava e le vaalele ia ona toe totogi e le vaalele, i le anoano o pisinisi ia i le toe totogiaina o uta.

Aemaise lava lau afioga i le Fofoga Fetalai, o Samoa, o lo o tu i le ogatotonu, e pito i laititi lona ogasami fagota. Ua avea nei Samoa o se atunuu e pitosili atu ona taua i Kamupani i'a tetele, ona o lo o siomia i tatou e ogasami tetele e 6. E faigofie ai ona fagogota i fafo atu, ae o mai tuu a latou ia i totonu o Samoa ma avatu ai i fafo.

FOFOGA FETALAI: Se i fai sau malolo laititi, se i tulai mai le Afioga i le Palemia.

Afioga Hon Fiamē Naomi Mataafa (Palemia): O lo o faalogologo lava ma le totoa i le saunoaga a le Afioga i le Taitai o le Itu Agai. O le mataupu i le vaalele, o lea ua ou matauina, ua see ese le Afioga, se i faamaea lelei mai le saunoaga. E na o le tasi lava le mea ou te fia faasao, ona o le auga o le tuualalo o lo o aumai, o le faia o le faaiuga a le tagata e le malamalama i mea tau tupe.

Lau Afioga i le Fofoga Fetalai, e leai o lea e malamalama le matou Minisita o Tupe, o matou faufautua. E pei ua ese sa matou vaaiga ma le mea sa i ai le faatofalaiga i le tatou faigamalo talu ai. E na o le pau lena o le mea ou te fia faasao, ona o le saunoaga, pe a fai faaiuga e tagata e le malamalama i mea tau tupe. Ma ou te fia faamanatu foi i le Taitai i le Itu Agai, o faufautua a le Kapeneta, i le taimi sa fai ai le faaiuga. O le latou fautuaga na avatu e le o sao le taimi e aumai ai le vaalele, ae sa fai lava le faaiuga. A o tagata ia, o tagata e malamalama i mea tau tupe.

FOFOGA FETALAI: Ou te iloa o lea ua maua mai e lau Afioga i le Taitai o le Itu Agai. Ua manaia lava le fautuaga. E pei o le tulaga lena, e pei ona saunoa le Palemia, ia silasila totoa ifo i ai, e le tataua ona taua lea tulaga. Ma le isi mea, silasila lau Afioga i le Taitai o le Itu Agai, o lea ua manino, o lea foi ua aumai le fautuaga, ou te iloa o la ua malamalamagia foi e le Maota.

E fautua atu ai i le Taitai o le Itu Agai, faasee ese mai lea mataupu, ae faaauau lau saunoaga.

Susuga Hon TUILAEP Dr. SAILELE MALIELEGAOI: Lau Afioga o lea ua maua. E pau lava lea lau afioga, e lua ituaiga vaaiga e te vaai i ai i le itu lea, e na o le itu lava tau tupe, ae e te le o vaai i le tulaga i le aoatotele, spinoffs ma le multiplier effect, o mataupu lavelave. Lau Afioga i le Fofoga Fetalai, o le tulaga la lena, e faaiu atu ai lau tautalaga i le vaalele.

FOFOGA FETALAI: Se i onosai mai pea lau Afioga i le Taitai o le Itu Agai. Tulai mai lau Afioga i le Palemia.

Afioga Hon Fiamē Naomi Mataafa: E saolele lava le saunoaga a le Taitai o le Itu Agai, i le mea lea e faapea o isi manuia e maua mai i le vaalele. O le manuia autu o le vaalele lea, o le turisi. Lau Afioga e leai ni turisi. O a la nisi mea faapea e faaaoaga i ai le vaalele, o le mea taumate. Ma le faaaloalo.

FOFOGA FETALAI: Ou te iloa o lea ua maua mai lau Afioga i le Taitai o le Itu Agai.

Susuga Hon TUILAEP Dr. SAILELE MALIELEGAOI: O lea ua maua, ae le o se mea taumate le ave o uta. Lau Afioga i le Fofoga Fetalai, o le ala lena na oo mai ai lau tautalaga, i le tulaga lea ua avea ai nei Samoa, ma atunuu ua agai mai i ai ia le tele o Kamupani ia. Ona ua latou iloa le itu taua tele e aoga lea e tumau e oo i le faavavau. O le sami e tele, ae o Samoa o lea e tu i le ogatotonu, si ona tamai ogasami lava. Ae 6 atunuu ma o latou ogasami tetele lea e siomia Samoa. I le vaaiga la faapisinisi, e sili atu ona taua mo i latou ma tele ai a latou seleni, i le omai e faatu o latou nofoaga tutotonu i Samoa, e omai ai o latou vaa, ma lau atu ai ia uta ia, e ave i fafo. O ai la lea o le a selesele i i? O le a selesele ai Kamupani Vaa a Niu Sila. Ma o le tulaga lea ou te talanoa atu ai, e tumau e faavavau. O le insurance policy lea le i ai o le vaa. E pule ai tatou i le tulaga o le faatonutonu tatauina o tagata e tataua ona aumai, e le o mamai, ma tagata e tataua ona taofiofi. Ae o le omai o isi vaa, e tele lava le faaletonu e maua ai i ina.

Lau Afioga i le Fofoga Fetalai, o le nuu lea o Solomona, sa tatou agai atu i ai, e ave a tatou...

FOFOGA FETALAI: Ia malie lau Afioga i le Taitai o le Itu Agai, se i tuu atu le avanoa i le Afioga i le Minisita e fitoitonu i le vaalele. Tulai mai lau afioga i le Minisita mo Pisinisi ma Alamanuia.

Tofa Hon Leatinuu Wayne Soialo (Minisita mo Pisinisi, Alamanuia ma Leipa): Faafetai atu lava i le sui usufono matua o le tatou Maota, po o le Afioga i le Taitai o le Itu Agai. E pau lava le mea e fia faamalamalama lau Afioga, o le vaalele lea na tatou aumaia, e le mafai ona ave ai ni i'a, e laititi lona cargo capacity. E na o vaalele a le Air New Zealand e mafai ona ave ai, ona e containerize, e mafai ona ave i totonu o container ona ave ai lea. Ae a faapea e aumai se vaalele tele atu a le Samoa Air Ways, o le 767 ma mea faapena, ou te talitonu e mafai foi ona fai i ai se fuafuaga ina ia mafai ona faatino ia fuafuaga. Ae mo le tatou tamai vaalele lea na aumai, e masalo e na o ni cargo laiti lava, aemaise foi o ato a i latou o lo o faimalaga. O le fesoasoani atu lea.

Susuga Hon TUILAEPA Dr. SAILELE MALIELEGAOI: Lau Afioga i le Fofoga Fetalai, e le o malamalama le Minisita i le mataupu lea e talanoa mai ai. A oo lona ina aumai ia uta, e talaiese uma lava ia..., pe a faapea e manaomia le faatumu i totonu o mea e nonofo ai tagata, talai ese uma lava nofoa, ae faatumu mai i uta.

FOFOGA FETALAI: Onosai laititi mai lava lau Afioga i le Taitai o le Itu Agai, se i tuu atu i le Minisita. Saunoa mai lau Afioga.

Tofa Hon Leatinuu Wayne Soialo: O le vaalele na tatou aumaia o le vaalele laupasese, e le mafai foi ona aveese nofoa, ona o le mamafa o le pusa i'a e ave i Niu Sila e 40 kilo, ae o le Tulafono a Niu Sila pe a taunuu le vaa i Niu Sila, e na o le 20 kilo e mafai ona loose cargo atu, ina ia mafai ona ave i fafo ma le vaa. I lalo o le Tulafono a Niu Sila, e le mafai e le aufaigaluega a le ramp a Niu Sila ona latou siia ni freight e ova atu ma le 40 kilo. O le mea lea e fia faamalamalama atu ai i le Afioga i le Taitai a le Itu Agai.

FOFOGA FETALAI: Ou te iloa o lea ua manino le saunoaga a le Minisita.

Le sui usufono mo Satupaitea, o ai e te faauilavea i ai?

Afioga Hon Lautafi Fio Selafi Purcell (Satupaitea): O le Minisita o....

FOFOGA FETALAI: E leai e le maua sou avanoa e te faauilavea ai i le isi faauilavea.

Afioga Hon Lautafi Fio Selafi Purcell: O le fesoasoani i le matou taitai. O la foi e faapena mai le vaega la e i o.

FOFOGA FETALAI: Ua lava lou silafia i Tulafono Tumau o le Maota.

Afioga Hon Lautafi Fio Selafi Purcell: O la foi e faapena mai le vaega la e i o. E leaga o au sa ou Minisita i i, o le vaalele...

FOFOGA FETALAI: Onosai mai lau Afioga i le sui usufono mamalu.

Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese): Lau Afioga i le Fofoga Fetalai, se i fesoasoani atu i le mataupu lea.

FOFOGA FETALAI: O fea e te faauilavea i ai lau Afioga i le Minisita?

Tofa Hon Olo Fiti Afoa Vaai: O i, i le saunoaga a le Taitai o le Itu Agai. E faamalamalama atu ai vaega ia.

FOFOGA FETALAI: O le eseese la lena lau Afioga i le sui usufono mo Satupaitea.

Tofa Hon Olo Fiti Afoa Vaai: Lau Afioga i le Fofoga Fetalai, ona o lea ua toe agai le Taitai o le Itu Agai i le vaalele, ae o lea sa manino atu lava lau folasaga, ona e le i auai ai foi le Afioga i le Taitai o le Itu Agai. O lea ua uma ona faamuta mai e le Kamupani a le PASO po o le kamupani foi lea e faia suesuega, e le gafatia e le atigi vaalele tulou, ia fuafuaga ia na manaomia e le tatou Malo, lea e pei ona saunoa i ai lana afioga. O lona uiga la, e le tataua ona tatou toe talanoa i ai. Aua e pe o le a le tatou talanoa i mataupu ia, o le siaki lava lea e fai mai Ausetalia le iuga o le tatou mataupu.

O lona 2, o lea na saunoa le Taitai o le Itu Agai, pei e foliga e tau le agavaa lenei Itu i mea tau tupe. Ae matou te le i oo atu i totonu o Faigamalo, o le matuai tagata lava o tagata le tagata lea na faia le fautuaga i le Kapeneta, lea sa pule i tupe o le Ofisa o Tupe, e aua le aumaia le vaalele e sese le taimi, ona o lea e feagai ma le Koviti. O la e silafia e le Taitai o le Itu Agai le tagata lea ou te fai atu ai ma le faaloalo.

FOFOGA FETALAI: Ou te iloa lau Afioga i le Taitai o le Itu Agai, o lea ua maua, ou te talitonu foi, o lea foi ua mausali le finagalo o le Malo i lea tulaga.

Susuga Hon TUILAIPA Dr. SAILELE MALIELEGAOI: Lau Afioga i le Fofoga Fetalai, o le a taatia maia le mataupu lea, ae leaga e tele atu taimi

sa ou Minisita ai o Vaalele, ou te iloa ai le tele o mea e mafai ona fetuunai. A o le itu lea, sa ou taua le atunuu lea o Solomona.

FOFOGA FETALAI: Lau Afioga i le Taitai o le Itu Agai, se i tuu atu i le Minisita. Tulai mai lau afioga.

Tofa Hon Olo Fiti Afoa Vaai: E sao lelei, e le sese le saunoaga a le Taitai o le Itu Agai, ua tele tausaga o Minisita i mea tau vaalele. Ga gau mai lava le Polenisia o Minisita le Taitai o le Itu Agai, lea e oo mai i le taimi lenei, o lea e faaluafesasi solo le tatou kamupani.

FOFOGA FETALAI: E fautua atu i lau Afioga i le Taitai o le Itu Agai.

Susuga Hon TUILAEPa Dr. SAILELE MALIELEGAOI: O le a le toe agai i le itu lea, ae ua ou malamalama lelei ia Olo. O le isi lea tagata [.....]. tele o le tatou Maota. O lea ua faauma atu lau...

FOFOGA FETALAI: Ia malie lau Afioga i le Taitai o le Itu Agai,....

Tofa Hon Olo Fiti Afoa Vaai: Lau Afioga i le Fofoga Fetalai, o se mea e fia faasao.

FOFOGA FETALAI: Tulai mai lau afioga i le Minisita.

Tofa Hon Olo Fiti Afoa Vaai: Lau Afioga i le Fofoga Fetalai, aveese ia ituaiga upu. Ia vaai i lona kuluku lea na fai mai nei, ua leva ona Minisita o Vaalele, na te silafia. O lea e fai sao atu lava lau tala, ona o la e molimau le atunuu. Na gau mai lava le Kamupani a le Polenisia o ia.

FOFOGA FETALAI: O lea ua maua. Manaia lena, see loa i Solomona lau Afioga i le Taitai o le Itu Agai.

Susuga Hon TUILAEPa Dr. SAILELE MALIELEGAOI: O le atunuu lea o Solomona, a silasila i ai, o la e lele lava le latou vaalele, a o lea sa tele faaletonu sa tutupu mai ai. O tatou foi o le atunuu ua agai nei i le 70 tausaga talu ona fai a tatou vaalele. Ma e o feutagaiga uma sa fai e le faigofie, ona e le muta i i, i mea tau tupe ae tele le vaaiga lautele e tatau ona fai e taitai o le Malo. E vaai i le itu o le faigofie, ma taugofie faigamalaga a o tatou tagata. E aumai le tatou vaalele, ua \$4,000 le tau o pasese e lele atu ai i inei ma toe foi mai. O le a le tulaga lea ua i ai nei? E le muta ai i, e agai pea i luga, o le ala lena o lea sa ou fai atu ai, e le na o tupe e vaai i ai le Malo, ae vaai i le manuia lautele o tatou tagata i le taugofie o pasese. Ma o lea la o le a tau

atu, o lea ua matua maoae le mea lea, ua ova i le \$1,000 le one way, ae sa oo i tatou i lalo o le \$800. O le tulaga lena e agai pea i luga. Ae na o ni manatu e faatu atu, ae o le pule ma le malosi e sui ai ia faaiuga o lena e i ina. O nei foi tausaga e tele sa feagai ai ma vaalele, sa matou i ai ma le Taitai o le Malo ua i ai nei, ma ona silafia ai e le faigofie talanoaga sa fai. Ona o le tulaga lava lea e le na o seleni e tilotilo i ai, ae tilotilo foi i le manuia lautele o tagata o lo tatou atunuu, i le faigofie ona maua gofie le vaa tatou te felelei ai i le taimi tatou te mananao ai, na i lo le mea lea o le a tupu nei, o le a toe foi tatou i faigamalaga e o i vaeluapo. Ae sa pule lava tatou ma faatulaga pasese, na oo lava i le \$800 le malaga atu ma le toe malaga mai. Ae o manatu nei lau Afioga i le Fofoga Fetalai, e na o ni fautuaga, ae lafo atu lava i le Malo.

O le isi vaega ou te agai i ai lau Afioga i le Fofoga Fetalai, i le aafiaga o le tatou tamaoauga, e leai lava se mea tatou te tua i ai. E pau lava lea o le mea tatou te tua i ai, o le meaalofa a le Atua na aumai i le tagata soifua na aumai lava i le amataga, o le laueleele, o tatou faatoaga. E sue taumafa i le afu o le tagata. O le mea la lea, o le tuualalo lea ia toe faamalosi a tatou faatoaga. O lea foi ua tele le fesoasoani a le Malo o Saina, ua latou aumaia ai isi ituaiga meatoto e fesoasoani tele i lo tatou atunuu. A o le iuga o mea uma, tatou te toe iu lava i le ulu, o fai, faapea foi ma talo. O mea ia e tatau ona faamautu. O nei i le taimi lenei, ua matua tele lava le faaletonu o le mea ua i ai a tatou faatoaga, ma e le o ni upu e avane ai.

E avatu le tuualalo i lau Afioga i le Minisita o Faatoaga, ia fai i ai lou fai mea lelei. Ia toe lagalaga a tatou faatoaga.

Ua maoae le aafia o le tatou lalolagi i le Koviti, o lea ua tele siama lea ua aafia ai tatou. E tatou te le iloa foi pe toafia le aofai, ona o lea ua agai atu i tua le faamai. O au lava ia, e le tupu fua mea faapenei, e i ai le lagona o mala nei, e fua i le uma atu o le isi siama, sau le isi siama. E le iloa foi pe i ai se isi siama o fougou mai. Ae aua le tuua lo tatou taumafai, e uunai pea o tatou tagata, e fai a latou tui. Ma tausolomua ia i tatou ona faaoga mea ia, o le tatou fesoasoani tele lena i si o tatou atunuu. E i ai le manatu o mala ia ua feagai ma i tatou, o mala ona ua leai se poloaiga a le Atua e le i solia, ua soli. E oo lava i Malo ua latou faatulafonoina ia le taga ona fasioti ia tagata.

E faaiu atu au upu lau Afioga i le Fofoga Fetalai, e momoli atu ai lau faamalo i lo tatou Maota nei. O uiga lava ia o le tatou Maota e avatu aumai, ae tasi lava le agaga. Pe ese foi fuafuaga ae tasi lava le agaga. E tatou te faaoga o tatou tagata, ina ia faia ni atinae lelei mo si o tatou atunuu.

Lau Afioga i le Fofoga Fetalai, ou te faamalo atu i lou lava papale ma le tuu avanoa i le Maota lenei ia latou saunoaga. Ua 8 ai ia Fofoga Fetalai ua ma faafeagai lau Afioga. Ma o le luitau maoae tele lea, o le faafeagai ma so o se Fofoga Fetalai, o le tuuavanoa i sui usufono e faaleo o latou finagalo. Ia, o le latou foi lea aiatatau e molimoli mai ai o latou finagalo aua le faufauina o le tatou sa. E lelei lava le sae o le tatou sa ae tatou i ai uma i totonu o le vaa ma tatou malelemo uma ai.

E i ai tatou Tulafono Tumau, ae i le faatinoga o lena Tulafono Tumau lau Afioga i le Fofoga Fetalai, e lualuagia pea i le tulaga o tatou tu ma aga o le faaaloalo e amanaia ai sui usufono. Ae e i ai pea le faaosoosoga i so o se Fofoga Fetalai ua le lava le onosai, e faaoga le paoa o Tulafono Tumau i nisi o taimi faasaga i le Itu lenei ma sui usufono o lo o agaia le tatou Malo. O lau tatalo, ia avea lau Nofoaiga lau Afioga i le Fofoga Fetalai, e manatua pea lou seasea ona e aapa i lou...[.....] i sui usufono o lenei Vaega i le saolotoga e faaalua ai o latou finagalo. Ae ia maua pea e lau Afioga i le onosai ma le lavapapale.

O le ala foi lena e i ai Malo ua latou faia faaiuga e aveese ai le Fofoga Fetalai mai so o se Vaega Faaupufai o i ai i totonu o le Maota ae aumai mai tua le tagata ona o le faataua o le mea lenei, o le aiataua e faaali saoloto ai finagalo i totonu o le Palemene lenei. Na o totonu foi o le Palemene lenei, a oo lava ina felauai lima, e immune i lalo o le Tulafono ona e faataua tele e Malo o le Taupulega le aiataua e saoloto ai sui usufono e faaali o latou taofi. Lau Afioga i le Fofoga Fetalai, ia o toe upu na o le lauga. Ia alofa le Atua e faamanuia mai i lau Afioga, faamanuia i le Afioga i le Palemia, Sui Palemia ma le Kapeneta ma le tatou Maota. Ia faapena foi ona faamanuia i le tapuaiga leleoa a Le Ao Mamalu o le Malo, le Sui Tofia faapea foi le Faamasino Sili ma tamaitai ma alii o le Faamasinoga ma lo tatou atunuu. Ia manuia Samoa aemaise le tatou alo atu e faafeagai ma mala ia o lo o faamalumalu mai ia Samoa, ae maua lava le tatou toomaga i le tatou nofo tatalo. Ua tele naunau ia mea tutupu sa tatau ona afaina ai le tatou atunuu ae na faasao lava e le Atua ona o aga ia e masani ai tatou, o le tatalo e le aunoa, aemaise o le amatalia o lenei tausaga, tatou anapogi ai ma tatou tulivae i luma o le Silisili Ese. Atonu e leai se Malo o le lalolagi o latou faia ia mea, e ao ai ona tatou sulufai pea i le Atua e le gata ina fesoasoani mai, ae faaali foi o tatou uiga e fai i totonu o le Maota lenei tulaga ia o le lavapapale ma le onosai. Manuia le tatou Fono, soifua ma ia manuia.

FOFOGA FETALAI: Malo faafetai, malo saunoa.

Susuga Hon Laauli Leuatea Polataivao Fosi (Minisita mo Faatoaga ma Faigafaiva): Lau Afioga i le Fofoga Fetalai, pe maua lava se avanoa faamolemole.

FOFOGA FETALAI: Oi ia, saunoa maia lau Afioga i le Minisita o Faatoaga.

Susuga Hon Laauli Leuatea Polataivao Fosi: Ioe. E leai lava se agaga e faalavelave i le saunoaga matagofie a le Afioga i le Taitai o le Itu Agai. Na pau lava lea lau Afioga, na ona ou piiama lava o le tausiga o le mamalu o le Nofoa. Faafetai o lea ua agiga lau matafaioi e ala i le tauavega o ou tiute faa-

Fofoga Fetalai. Ae a toe tomanatu lava i futia ua sola ma aso ua alu i lena foi Paeaiga na uma atu, ia, o lena e te silafia mea na tutupu, mea foi sa tutupu ma le tulai mai foi o faafitauli i lou taumafai e fofa ma faataatia le Maota i le tulaga e tatau ona i ai.

Ae ua ou tulai atu lava o le upu lea o le lima tui tagata po o le lima tuli tagata, faamolemole lau Afioga. Ou te faaeteete pea ma puipui le Nofoa, leaga e le o i ai sou aao faapena, o lou agaga atoa o le puipui ma le mamalu ma tausi le filemu o le tatou Maota. Ua ou tapa ai faamaumauga a le Palemene ina ne i avea le mea lea na tupu nei i le taeao e faauigasese ai lau faaiuga. Ua ou tatalo ai i lau Afioga i le Fofoga Fetalai, aveese upu ia ma tatou faamaumauga, leaga e taitaiseseina ai le mamalu o lau faaiuga ma le mea ua tatau ona fai i le taeao lena.

O le tatalo lena ma le agaga faaaloalo.

FOFOGA FETALAI: Ia, saunoa pea po o se lafo lau Afioga i le Minisita o Faatoaga?

Susuga Hon Laauli Leuatea Polataivao Fosi: Ou te faatuina atu le lafo, *E aveese upu ia ma faamaumauga a le Palemene.*

Faaluaina e le Minisita mo Galuega, Felauaiga ma Atinae Eseese.

FOFOGA FETALAI: E lua la upu ia e manaomia e fia faatu mai ai se lafo, o le upu lea sa taua o le kuluku i saunoaga ia.

Tulai mai lau Afioga i le Minisita mo Galuega, Felauaiga ma Atinae Eseese. E i ai se lafo e aveese ai upu ia?

Tofa Hon Olo Fiti Afoa Vaai: Ia, faafetai atu i lau Afioga i le Fofoga Fetalai. Faafetai foi i lou mataala foi i tulaga o gagana e faaaogaina.

Ae ua ou faatu atu le lafo, *Ina ia aveese le upu lea o le kuluku e na o kaupoe e maua ai.*

Ma le faaaloalo.

Faaluaina e le Minisita mo Pisinisi, Alamanuia ma Leipa.

Na faamaonia le lafo.

[Upu na faatonuina e le Fofoga Fetalai e aveese mai faamaumauga o saunoaga a le Taitai o le Itu Agai. *“lima tui tagata ma le kuluku.”*]

Susuga Hon TUILAEPa Dr. SAILELE MALIELEGAOI: Lau Afioga i le Fofoga Fetalai, e tatau lava ona avatu pea sina au upu...

FOFOGA FETALAI: Ia se i toe... o lea ua afulelea lau saunoaga, e ese le matagofie.

Susuga Hon TUILAEPa Dr. SAILELE MALIELEGAOI: E faaiu atu ai le lauga, ou te saga faamanuia i le Afioga i le Minisita o Faatoaga, e faapena foi ma le Minisita o Galuega. Ia faamanuia atu le Atua ia oulua i le lua lotu faamagalo.

FOFOGA FETALAI: Malo faafetai. Ia, ou te talitonu o lea ua afulelea lava le saunoaga a lau Afioga i le Taitai o le Itu Agai. Ne i pea mai foi le Maota po o le a le mea ua tuu avanoa ai i le Afioga i le Taitai o le Itu Agai, ona sa talosaga mai e le o atoatoa foi lona malosi. Ae tatau lava ona tatou tuuavanoa faapena. O le agaga lena. Ou te talitonu, faamalo i lau Afioga i le Taitai, e tele lau faasoa, ae o le auga lava o le matau a le Nofoa, ia taatia ese o tatou lagona faa-Vaega Faaupufai ae tatou galulue faatasi mo le manuia o le atunuu. E ese le taua o lea saunoaga. Ou te talitonu foi, o lea ua faafogafoga ma le totoa le Afioga i le Palemia ma le Kapeneta, a o lea ua aumai lau fesoasoani ma lau faasoa ma le tuualalo, ou te talitonu foi o lea ua nofoilo ia le Afioga i le Palemia le lagona ua faaoo mai i le Kapeneta ma le faigamalo. Ou te talitonu o lea ua latou maua lelei le tuualalo.

Ae ou te talitonu, ou te iloa o le saunoaga mulimuli lea leaga o lea ua mae'a saunoa le Taitai o le Itu Agai aemaise foi o le Sui Taitaifono o le Komiti. O le avanoa lava na ou tuua i le Taitai o le Itu Agai, ona e taua, e taua tele, ma ou te talitonu foi e le toe ganeganea foi se saunoaga a se isi o lea Itu o lea ua saunoa le Taitai o le Itu Agai, ua uma ona folasia lona finagalo atoa. O lona uiga, ou te talitonu o lea ua i ai outou finagalo i le saunoaga matagofie a le Afioga i le Taitai o le Itu Agai.

O le mea lea, o le avanoa lea...

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga i le Fofoga Fetalai...

FOFOGA FETALAI: Ia, se i saunoa mai lau Afioga i le Sui Taitai pe i ai se mea ua e le malie ai? Ia saunoa mai lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: Ia, e leai ae ia manatua lau Afioga o lea lava ou te mulimulitai i lou finagalo na faaalua i le tatou Fono ae le i malolo. O lea la na totoa mai ai Leala ma au, o lea la ua tuli i fafo Leala ae o lea ua taofi ai ma au. Ae ou te faaoololomaau atu i lou finagalo, e sao, aua o lea sa... manatua sa e saunoa. Sa oomi lou moli ou te

tu i luga ou te lauga, ae fai mai lau saunoaga e uma loa ona ou lauga, ona saunoa loa lea o le Taitaifono o le Komiti o Tupe. O lea la sa ou nofo lava ma usitaia lou finagalo, ae o au, ua leva ona ou fia lauga. O lea la ua afio mai le Afioga i le Taitai i lenei taeao ua maua sona malosi, faafetai viia le Atua. O lea ua tulai e saunoa, faafetai i le saunoaga matagofie a le Afioga i le Taitai. Ona o lea ou te tau matau atu, masalo i te i ua vave tuumuli ona o faatonuga a alii ma tamaitai fomai. E pei o le mafuaaga lea ua ala ai ona tuu i ai le faaaloalo e saunoa muamua lana Afioga i le Taitai. A e finagalo ou te malolo ai ma au i i, ia, ua iloa e pule lava lau Afioga i le tatou Tulafono Tumau.

FOFOGA FETALAI: Ia, o tulaga aloaia, o le ala lena sa ou fesoasoani atu ai i lau Afioga i le Sui Taitai. Sa faapea i lena taimi ailoga a lava mai ma auai mai le Afioga i le Taitai o le Itu Agai. Ia o tulaga lava e masani ai o le tatou Maota, e faapena. A saunoa loa le Taitai o le Itu Agai, ua maea uma lagona o lena Itu o le Maota.

O le mea lea e faamalulu atu i le sui usufono mamalu.

Tofa Hon Lauofo Fonotoe Nuafesili Pierre Lauofo: Ia, pe tasi lava pe lua ni nai motugaafa i lenei taeao e tau lava ina...

FOFOGA FETALAI: Ia, ua lelei. O le a tuu atu le avanoa i le...

Tofa Hon Lauofo Fonotoe Nuafesili Pierre Lauofo: Ua amata ona tau matau atu e pei lava o lea o le a tulai le Afioga i le Taitai ona o faatonuga a alii ma tamaitai fomai.

FOFOGA FETALAI: O lou le alofa lena i lou Taitai le... ae... Ia ua lelei, saunoa mai, o lea ua toe tuu atu le avanoa.

Tofa Hon LAUOFO FONOTOE NUAFESILI PIERRE LAUOFO: Faafetai i lau Afioga ua maua se avanoa i lenei taeao fou, ae faamauina lava le faatalofa aloaia atu i lau Afioga i le Fofoga Fetalai faapea foi le Afioga i le Palemia ma le Sui Palemia, le Aiga Kapeneta. Afio foi le Sui Fofoga Fetalai ma Afioga i Minisita Lagolago.

Ia, o lea foi e afio atu le Afioga i le Taitai o lenei Itu o le tatou malu, eetai foi Afioga i sui usufono mamalu o le tatou Itu Agai i totonu o le Maota o le atunuu.

E faatalofa atu foi i Afioga i Ofisa Sili o Pulega o Matagaluega faapea foi Pule Sili o Faalapotopotoga Tumaoti a le Malo i lenei taeao fou.

Ia, le tapuaiga a Samoa mai ona ao seia oo i ona iu, ia ua faamalo le folau.

E manatu lau Afioga i le Fofoga Fetalai, o lea ua maea ona e faailo tafailagi e pei o le mavaega i le itulagi lea. Ua uma foi ona e sasa le fala e pei o le

upu e fai i le faiva o poula i le tatou vatapuia ma le Atua soifua aua o le upu moni, e toulu fuga o laau e mou nanamu, e taape foi fatu o ati, ae o le alofa ma le agalelei o le Atua e le mavae mo i tatou e tumau pea. Malo faafetai. Faafetai i le taulaga osia i lenei foi taeao fou.

Ia, e i ai foi le lagona ma se manatu o paia faaifogata o Samoa, o le a ee i fata o ao ma lagi, o le a taoto faamaene o tai loloto aua ua maea ona faalauatea. Ua uma foi ona tofi tofa, ua taofu foi i fata ae ae i lumanale. O le maa foi faafuagalua e iloa ai le vaeluaga o le tai. Ae manatu foi e le o se ogasami e toe fagota sagolegole i ai se tautai. Ona manatu lea, o le a taoto ia i paga faatini o tausala paia o sa o faiga o le atunuu o le a le afea i sau gagana i lenei taeao.

Lau Afioga i le Fofoga Fetalai, ia o lea lava ua tuu i le tai le tatou sa i lenei foi tausaga fou, le tauaofiaga muamua e amatalia ai le tatou galuega ma le tatou folauga i lenei tausaga. Ua tuanai atu lenei tausaga, atuvasa e fia na o tatou folauina ai peau tagutugutu o galu fatioo ma auma fatilolo foi o le vasa, ae fonofaapipii foi i talosaga a sui usufono mamalu pei ona opea i le Maota i lenei foi vaiaso i ona tua atu. Ia, gase atu ia le tausaga 2021 faatasi ai ma mea na tutupu ai, ae tuu i le Atua le tatou folauga i lenei tausaga fou ina ia tatou taunuu i le nuu o manuia i lona siui.

E le faagaloina nai uso ma tuafafine, o tina foi ma tama, o alo ma fanau faapea foi nai fanau iti o lo o faanofoesea nei i le Maota Gasegase i Motootua ona ua aafia i le siama o le faamai o le Koviti-19. Ia lea ua i luma o le Atua a tatou talosaga, ia lata mai se aso e tafieseai ai le siama o lo o aafia ai latou ae toe foi i tulaga masani o le soifuaga pei ona sa soifua ai. Ua logo faatutuila le Maota i saunoaga matagofie ma le malie a Afioga i sui usufono mamalu ua maea ona saunoa e tusa ai ma le Tala Faaopoopo o le Tupe.

E le mafai ona faagaloina nai uso i Toga lau Afioga i le Fofoga Fetalai na afea foi i a tatou talosaga i le Maota nei, i le faalavelave faalenatura matautia ua aafia ai i latou, le mauga mu ma le tsunami, ua mafua ai le tele o le efuefu la ua afaina ai le tele o motu ma le suavai taumafa, matamata atu ai i luga o upega tafailagi. Ia, o faalavelave faalenatura faapenei ua aafia ai tele lo tatou siosiomaga ma le tau. E pei ona saunoa foi le Afioga i le Taitai o lenei Itu, o luitau malolosi ia ua feagai nei ma lo tatou atunuu ia ma atunuu uma o le lalolagi. O le faamai, suiga o le tau ma le tulaga maaleale tele o le tamaoiga ua i ai nei, e le gata ia tatou i Samoa nei ae faapena foi le lalolagi. Ae faapena foi aafiaga o tekonoosi fou faaneionapo ua mafua ai le tele foi o isi mau faafitauli ua feagai ma atunuu o le lalolagi. Ia, e ala atu ai le tuualalo i le tatou Malo, se i toe silasila i a tatou fuafuaga alualumamao. O nei foi fuafuaga alualumamao ua maea ona faataatitia ma faataotooto e pei o le tatou SDS faapea foi ma le isi tatou fuafuaga alualumamao lenei sa faataoto i le 20 tausaga le agai atu i luma. E i ai lava le fautuaga, se i toe silasila pe toe iloilo ane i a tatou fuafuaga na ona o le tulaga ua televave suiga ua oo mai e mafua mai i faamai ma le suiga o le tau ua aafia ai ma le tatou tamaoiga.

O se tuualalo e faapena ona faataoto atu i tulaga o faiga faavae lautetele o faigamalo aua le agai i luma ina ia lelei ma lava tapena se tatou taiala mo le agai atu i luma. O lena e i ai fuafuaga na, ae o le tuualalo se i toe silasila ma toe iloilo a tatou fuafuaga na. A o le siosiomaga lava ma le aafiaga o le siosiomaga, o lo o ua tulai mai nei i le tatou faaitulagi o le Pasefika e afua mai i faalavelave faalenatura lea na tulai mai Tonga, e tataua lava ona tatou toe mataitu ma tatou silasila tatou i Samoa nei i a tatou tapenaga. E i ai tatou fuafuaga ma tapenaga o le siosiomaga pei ona faataotooto mai isi tausaga ua tuanai. E lelei lava mea faapea e toe fafagu ai ma toe faatupu manatu ina ia toe silasila i tapenaga ia o le tatou siosiomaga.

FOFOGA FETALAI: Ia, ua ou vaelupeina le saunoaga a lau Afioga i le Sui Taitai, talu ai ona o lea ua tatou oo i le taimi o le tatou malologa masani. Ia, toe faaauau laitiiti lau saunoaga pe a maea mai le tatou malologa.

O le mea lea, e faataatiaese Galuega a le Fono Aoa mo lana malologa masani.

Na faataatiaese Taualumaga a le Fono Aoa Faitulafono mo lana malologa masani i le itula e 10:45 i le taeao ma toe faaauau i le itula e 11:17 i le taeao.

FOFOGA FETALAI: Ou te faasilasila atu ua toe amatalia nei Taualumaga a le Fono Aoa Faitulafono. I le toe talii mai ai i le tatou malologa masani o le taeao, e momoli atu ai le faamalo. Ua matu i fau le taligasua a le paia o le Palemene. E i ai le talitonuga, ua maua se faasiligamalosai mo le faaauauina o le tatou galuega. Ua faamalo le onosai.

Ou te tapa ma le faaaloalo lau Afioga i le Palemia mo le lafo.

LAFO MO LE TOE TEUTEUINA O ITULA FONO

Afioga Hon FIAME NAOMI MATAAFA: Lau Afioga i le Fofoga Fetalai, a o tatou i ai i le soalaupulega faaauau o le Tala Faaopoopo Nu.1 o le Tupe 2021/2022, o lo o tatou mataitu lava tulaga talafeagai mo le sologa lelei o la tatou galuega. O lea ou te tulai mai ma le faaaloalo tele e faatu le Lafo, *Ina ia faataatiaese a tatou Tulafono Tumau 32(1), mo le suia o a tatou itula fono mo le aso. E faapea, o le a faaauau pea a tatou Taualumaga seia aulia le itula e 1:00 i le aoauli, ona faataatiaese lea ma toe faaauau i le itula e 6:00 i le afiafi seia tolopo i le itula e 10:00 i le po a nanei.*

O le lafo lea lau Afioga

Faaluaina e le Sui Palemia ma le Minisita o Faatoaga ma Faigafaiva.

Na faamaonia le lafo.

FOFOGA FETALAI: O le a faaauau le tatou galuega seia aulia le itula e 1:00 i le aoauli nei, ona faataatiaese ai lea seia tatou toe tauaofia i le itula e 6:00 i le afiafi ma tolopo atu ai lava seia oo i le itula e 10:00 i le po a nanei.

E faataatiaese a tatou Tausalumaga i le malologa o le taeao, o saunoa le Afioga i le sui usufono mamalu mo Anoamaa Nu 2 po o le Sui Taitai o le Itu Agai.

Ou te tapa lau Afioga e tulai mai e faaauau lau saunoaga.

Tofa Hon LAUOFO FONOTOE NUAFESILI PIERRE LAUOFO: E momoli atu foi le faafetai i lau Afioga ma le mamalu o le Ofisa, ua saoialo le taumafataga ma le tauteaga foi i afioga i sui usufono mamalu o le Maota. Ua malo faafetai.

Ona oo mai lea o se tautalaga i le tulaga e tuutiitia ai ia aafiaga o le tau. O lea sa ou talanoa e pei ona suanoa nisi o sui usufono i le tatou faatanoa. O le atinae lea i Alaoa, le faatanoa tele lea sa fuafua e fausiaina i Alaoa. O le a ou le toe agai i le tele o isi vaega ua maea ona sausaunoa i ai sui usufono, i le taua o lena foi itu. Ae o se fono faapipii o lou foi usugafono, i na i mataupu laiti ia e fitoitonu i lena foi vaega.

E matauina o le tatou atinae lea e faatupeina i le US\$100 miliona, o se foai. O lona uiga e le toe tologia lena tupe tele, a o se fesoasoani tele lena mo lo tatou atunuu, faapea foi lo tatou tamaoiga. Ia ma isi tatou atinae, auala tetele ia agai i tua i Falealili, e ui atu i Tiavi, auala i sasae ma le auala i sisifo. Ma isi foi atinae e pei o faleaoga e fesoasoani mai ai le Malo o Saina. E pei o vaega taua na, ona o nei foi foai, o se foai e le o i ai se vaega foi lea faapea e toe alu ai se tatou tupe, e toe togitogi. A o nei foi grant po o foai, e aumai i lalo o tuutuuga po o aiaiga faapitoa. O lona uiga a le faaaogaina e toe foi lava i Faalapotopotoga po o le atunuu na auina mai ai le foai. Ae maumau e pe a na faapea e mafai ona toe faaaoga i se isi tatou atinae. Ae peitai ona o tuutuuga ma aiaiga o foai e faapena ona usitaia.

FOFOGA FETALAI: Se i fai mai sina au malologa lau Afioga i le Sui Taitai.

Lau Afioga i le Minisita o Galuega.

Tofa Hon Olo Fiti Afoa Vaai: E faafetai atu lava i le Sui Taitai i le mataupu lea ua laga. E le o i ai lava se tulaga e taofi ai le atinae lea. Ma ua uma foi ona soalaupule ma toe fesoatai atu i le Minisita o Tupe, ma o la ua faagasolo le tulaga o le faataunuina o le atinae lea ma le faaloalo.

FOFOGA FETALAI: Ou te iloa o lea ua manino lea vaega lau Afioga i le Sui Taitai.

Tofa Hon LAUOFO FONOTOE NUAFESILI PIERRE LAUOFO: E faafetai o lea ua manino, le faatofalaiga a lau Afioga i le Minisita. Ua malo faafetai. Ioe, o lea ua manino tulaga ia, ae i ai le mafuaaga na ala ai ona ou pai i tulaga ia o atinae tetele. O le taua o le faatanoa lea e pueina ai le suavai, aemaise lava i vaitaimi e mamafa ai timuga, e tatai uma ai le suavai i uta e palasi i uta i le tuasivi agai mai i le vanu lea e agai mai i le faatanoa lea.

E tuuitiitia ai le lolovaia o le taulaga o Apia, e pei o le mafuaaga lena na ala ai ona ou oo i le atinae lea. Ona o lea foi ou te tautala i aafiaga o le tau ma le tatou siosiomaga. O suiga o le tau ua oo mai. E tasi lea taua o le atinae lea, ina ia taofiofia ai le suavai lea ma e maua ai foi le eletise, o le eletise foi e maua i le suavai o se eletise e taugofie. E pei lava foi o isi malosi faafouina o lo o gaosi mai ai le eletise e pei o le la. Aua e fai lava si taugata o eletise ia e gaosi mai i afi suauu ia e i Fiaga. E ma o le tele foi o na suauu, o lo o aia ai foi tatou foreign reserves, aua o le tele o tatou foreign reserves o lo o faaaoga i le faatauina mai o suauu, penisini ma ituaiga mea faapena o lo o manaomia i totonu o le tatou atunuu.

A o le taua o le vaega lea e mafua ai ona ou talanoa i atinae lea, ae faafetai o lea ua maua o lea o le a o le a faaaauu. Ona o le tele o a tatou atinae e faatino, o le tele foi lea o oloa e auina mai i totonu o le atunuu, o le tele lea o pusa oloa. E ma o le tele foi o pusa oloa e aumai e fau ai atinae nei, e pei o le faitaitaiga o sima, uamea, o a uma mea o ta e valitaina le auala, o le tele o pusa oloa e aumai i luga o vaa e agai mai i le atunuu. E manatua foi o le sau o pusa oloa ma mea taumafa, o le tele foi lena o pusa oloa e faasafua i ai totogi o le vaa po o le freight, ona pau foi lea i lalo o le tau o oloa. Ae afai foi ae tuuitiitia oloa e auina mai i le atunuu, o lona uiga ua tuuitiitia foi pusa oloa e faasafua i ai le freight, ua taugata foi le tau o tatou oloa. O le isi itu e tau ia te au atinae faapenei, ona o le tele o pusaoloa, e auina mai i totonu o le atunuu ma faaulufaleina mai, o le tele foi lena o tupe e aoina e lo tatou Malo i le uafu. O le tiute, o GST, aua e totogi foi le GST i le uafu, o le totogi o le uafu po o le wharfage o tupe uma lava na e ao e le tatou Malo e le Matagaluega o Lafoga ma Tiute, e faaaoga i tatou atinae ma faasoasoa i isi tatou developments i totonu o le atunuu. A pau foi le tatou import ua pau foi le tatou tupe maua. O lea la e pei e tau maua i lenei vaitau, ona o le maaleale tele o le tulaga i le tamaoaiga ua i ai. Ona o aafiaga lava o lo o aafia ai le lalolagi atoa, ua pei ua tau fai ifo foi i lalo a tatou import, lea la pei ua tau pau ai foi le tatou tupe maua i le matau atu i ai.

A o tulaga na, i tulaga lava ia o faiga faavae lautete, lea e taumafai atu ai se manatu ma se fautuaga, a tuuitiitia imports ua tuuitiitia foi a tatou tupe maua, tatou revenue collection. A tuai ona faatino a tatou atinae tetele, o lona uiga ua tolo atu i tua i se isi vaitaimi, ua le maua foi na tupe maua a le

Malo i le port of entry po i i le uafu. Ae oo atu foi i lena taimi e faatino ai, ua alu i luga le tau o oloa, ua taugata foi. O fautuaga lava ia, se i silasila ane ina ia vave faatino a tatou atinae nei mo le siitia o tulaga o le tamaoaiga, ma fesoasoani i le tau o le soifuaga, ia tuutuu i lalo le tau o le soifuaga.

A o le tulaga lava ia o le maaleale o le tamaoaiga ua i ai le atunuu ma le lalolagi, malo faafetai. Ua matauina foi e lou sui usufono nisi o tulaga tau faamama-avega ua tuuina atu i le tatou atunuu. E momoli atu ai le faafetai i le Faigamalo, malo faafetai i ia foi faamama-avega ma foai. O lea ua i ai foai e pei ona matauina i le Tala Faatatau Autu o le Tupe, e \$5 miliona i le Asosi o le Au Faifaletalimalo.

Ua malo faafetai foi i lea fesoasoani mo i latou. E pau lava lea, se i tautuana fautuaga a le Komiti o Tupe o lo o aumai malosi i totonu o le latou lipoti, ina ia faamalositia le accountability o tupe ia e foai atu. O lona uiga e tatau ona toe lipoti mai i le Malo, o lea sa faaoga tatau ma faaoga lelei ia tupe. O lea foi na matauina sa ave le \$3 miliona i le SUNGO, le Faalapotopotoga Tumaoti. Ia o fesoasoani taua uma na fesoasoani. O le \$150,000 sa ave i Faalapotopotoga tau pisinisi Private Sector, malo faafetai. O vaega uma na e taua mo le taumafaiga mai o le tatou Private Sectors ma le tatou Communities.

E taua ai tele ia foai na, ae o lea foi ua maua ua pau pasese o vaa, o se faamama-avega foi lea mo le mamalu o le atunuu o lo o afifio ma papaaao i le motu i Salafai. E faapena foi Tumua nei, o i latou foi o lo o malaga foi i o aua faalavelave ma mea e fai i le tatou motu tele. Ae le o aafia ai la tau pe o maua se pau i le totogi o taavale afi, o lo o ave i luga o vaa. Se i silasila ane i lena tulaga, aua o le toatele lava o le mamalu o le atunuu, o lea ua ave a latou taavale afi e feoai ai i le va o Upolu ma Savaii e auala atu i luga o le tatou vaa.

Ua pau foi le tau o laisene pisinisi, e ui lava ina le fai pisinisi ia tagata uma o le atunuu, ae momoli atu ai le faafetai i le tatou Faigamalo. Aua o au foi le isi faipisinisi, faipisinisi laititi. O lea la ua maua foi sia faamama-avega. Ua pau le laisene pisinisi. O le a foi ua pau le totogi po o le tau o tusi folau. E ui lava foi ina le malaga uma tagata o le atunuu, aemaise lenei vaitau o lea e tapunia borders, a o lea ua maua lea avanoa e faafou ai tusi folau ua expire, ma faatau ma totogi ai tusi folau o i latou e fuafua o le a malaga pe a toe i ai se taimi e toe tatala ai femalagaaiga.

O lea foi ua pau le tatou eletise, malo faafetai. O lau matau i tusi o lipoti faale-tausaga a le EPC lea e aumai i tausaga uma i luga o le Maota, o lau matau ma faitau i ai faale-mafaufau. E masalo e le i lalo ifo i le \$10 miliona le tupe a le EPC lea ua le maua i le pau lea. A o lea foi e aoga i le isi itu e faamama-avega i le mamalu o le atunuu, e pau ai i lalo le tau o le eletise.

O lea foi ua pau le tulaga o oloa e faatauina atu i fafo po o tatou export. E pau foi le tatou tupe maua e maua mai i tatou export. O lea foi e matau atu, ua tuuifititia foi tatou imports, o tatou oloa.

O le fautuaga se i silasila ane i le tulaga, o lena e i ina le tofa ma le uta a le faimea, ina ia faapaleni mea ia a tatou. Ina ne i te i ua mamafa pito tasi, ona faaletonu lea, paulia lo tatou sa, e pei ona saunoa foi se tasi o sui usufono i lana saunoaga i totonu o le Maota, ne i alualu lo tatou sa paulia. Ae silasila atu i vaega uma na, ina ia faapaleni, aua a alualu ae faaletonu, e na o le lua lava mea e tua i ai le Faigamalo. O le nono mai o tupe, e leai se Faigamalo e manao e fai le mea lena. Ma lona 2, o le sii o lafoga aemaise le GST, e leai foi se Faigamalo e manao e fai lena mea. Ae se i silasila lelei, faasoasoa lelei, ma faasoasoa tatau ane le tulaga o tatou tupe maua.

Lau Afioga i le Fofoga Fetalai, o lea ou te manatua le tausaga e 2007 sa faataatia i le laulauafono lenei se Tulafono Tau Faaofi, e teuteu ai le Tulafono a Nakoti 1967, e lua lava vaega taua na aumai e le Tulafono Toe Teuteu lena, 1. Ia aofia uma i totonu ia fualaau faasaina fou ua aliae mai e le i maua i le 1967, ma ua maua i totonu o le atunuu, ua i ai fualaau faasaina na. 2. Ia sii i luga faasalaga i le le itiiti ifo i le 14 tausaga i le falepuipui. O vaega taua na e lua na aumai i le Tulafono lena. Ae ua mafua ona ou taua le vaega lena, ona o lea lava e matauina, i luga o le tv ma le nusipepa i osofaiga a leoleo, o lo o maua pea mea ia i totonu o le atunuu. Ua tilotilo foi ua tele se afaina o le atunuu i ia mea, o fualaau faasaina ma mea ia.

Se i silasila ane le Afioga i le Minisita o Faamasinoga ma le Minisita o Leoleo faapea le Ofisa o le Loia Sili i se faiga e toe faamalosia atili ai le Tulafono ia, ma tilotilo i ni aoaoga a i latou o lo o aafia i ia mea. Ina ia faapena ona faamalamalama i ai aafiaga ogaoga o nei foi fualaau faasaina.

Ona agai mai lea o sau faamatalaga i le vaega lea sa taua ma afea i saunoaga a nisi sui usufono, le tatou xray lea, le scan i le uafu. E faafetai o lea ua taoto i le Maota le finagalo o le Malo, e leai e le taofia e aumai lava le tatou scan lea, malo faafetai. O le a ou le agai i itu na agai uma i ai isi sui usufono, i o mo fualaau faasaina, o aupega, o a uma mea e maua ai i le masini lea i le uafu pe a faaulu mai i totonu o le atunuu i le uafu.

A o le itu e ave i ai le faamamafa o lou sui usufono i le tatou scan lea, i le tulaga o le puipuia o le tatou siosiomaga ma faatoaga. E i ai foi lou talitonuga o le taua o le scan lea, o le a maua ai laau ma manu laiti faalafua e ono sao mai totonu o le atunuu e ono aafia ai lo tatou siosiomaga ma aafia ai a tatou faatoaga. O le faataitaiga o le sisi Aferika, masalo a na i ai se tatou scan i lena vaitaimi, e masalo e maua a i le uafu ma faatamaia ai ia le tulaga lea.

E taua tele la le scan lea i le vaega o le Quarantine o le tatou Matagaluega o Faatoaga i lou lea talitonuga. Ae o lea ua taatia ma faataoto mai le finagalo o le Malo, e leai e le taofia le tatou masini lea. Ae pau lava o lea, o lea ou te matau ua uma ona tender le masini, afai o le a se fuafuaga, afai o se fuafuga o le a toe retender le masini lea. Ia se i silasila lelei i le tulaga o aiaiga o tauofoga ma le Komiti o Tauofoga i le Taitai Komiti ma le Afioga i le sui Taitai, le Minisita o Tupe ma le Minisita o Atinae tetele i vaega uma ia, pe a faapea o le faamoemoe e toe faasalalau ia tauofoga mo le tatou masini lea.

Ae faamalo faafetai i le tulaga lea na aumai i le aso 23 Tesema i le lisi o tauoloa fou. O lea e matau atu o lea ua tatou toe foi i tua i le faiga faavae sa sau ai. Ua ou toe tau manatua, o le vaitaimi o le 1970, 1980, seia oo mai pei o le 2004 lea ou te tau manatua, sui ai loa le tatou faiga faavae, faataatiaese le Price Control Board lea e aumai ai latou lea e faatulaga maia le lisi o tau o oloa. Ae sui loa i le tatou faiga fou lea ua tatala foi lele i le open competition. Ua tuu i tauvaga, ua fai fai ua tuu i faiga faatauva a faleoloa ma kamupani, o i ina e maua ai le tau taugofie, e faapau i lalo. O le tauvaga e le manao le isi faioloa e taugofie atu oloa a le isi faioloa i ana oloa. Ona tauva lava lea ma alu ai i lalo le tau o oloa.

E pei o le mea sa ou matauina, e pei e i ai se tulaga e le o mautinoa i lau vaai, o le faiga fou lena po o le suiga o le faiga faavae lena, e i ai le komiti po o le komisi e supervise ina le faatauva lea, e tau o le Competition and Consumer Protection Commission. Ou te le iloa po o active, a o le komisi lena e mataituina tauvaga a pisinisi ia, ia aua ne i i ai ni uiga po o ni aga faapisinisi e taotaomia ai ni faiga faatauva. O lona uiga ua tatala le faiga faatauva i oloa uma.

Aua e 2 vaivaiga e matauina i le Price Control Board, masalo e le silafia e le mamalu o le Maota. 1. E le aafia uma ai oloa taumafa. E pau lava oloa na e aumai ai, o oloa e basic consumer items po o foodstuff, o oloa taumafa alumia e i ai, alaisa, suka, eleni, pisupo, mea faapena, e le aafia uma ai oloa taumafa. E le aafia uma ai foi oloa faufale. O lea foi sa saunoa nisi o sui usufono i le taugata o le tagasima, e le aafia uma ai uamea, laupapa mea uma faapena. O le mafuaaga lena na sui ai tatou faiga faavae ae tatala loa i competition, ma e aafia uma ai lava oloa.

A o lea ua aumai, ia lelei, atonu ona o lenei vaitau o le faamai, ua tatou toe foi ai i tua i le faiga faavae lena sa i ai o le Price Control Board. E pei ona saunoa ia le Afioga ia Tapunuu i lana saunoaga, o le Price Control Board e le tuua ai i lalo le tau o oloa, e pau lava le mea e fai o le set o le tau o le oloa, ina ua avatu pepa ia e faaulufale mai ai oloa i le atunuu, ona ave lea i le MCIL tilotilo latou i ai ma set le tau. O lona uiga e ono aumai i luga le isi oloa, avatu i lalo le tau o le isi oloa, set ina ia laugatasia uma lava le tau, e faatau ai e pisinisi uma le oloa.

Ae faafetai o lea e matau atu le Afioga i le Minisita o Faatoaga, o lea ua toe lalaga mai le tulaga o le tatou feed meal. Atonu foi o lea ua silasila i isi foi i isi feed meals na fai i le tele o tausaga ua tuanai, ma na i faaletonu foi sa tulai mai ai. Ae atonu o lea ua silasila i ai lau Afioga ma toe tagatagai lelei, ma le toe faatulai mai o lenei foi taumafaiga, ma atinae taua. Ina ia lava ai ia meaai mo tatou meaituaolo, manupapalagi faapea foi ia moa. E pau lava le fesili i lau afioga, po o faatu ma se tatou feed meal i Savaii pe na o Upolu lea e faatu ai le tatou feed meal, ma le tulaga i le tau, pe o se tau taugofie pe ave fua foi. A gafatia foi ona tufa i le atunuu i le afaifaatoaga, o se faiga

lelei foi lena faiga. Aua o lea e gaosi ai a tatou meaai ia mo tatou meaola aua tatou maketi, aua foi le fofoga taumafa o le atunuu.

Ae malo faafetai i le tulaga o le faasoa ma le foai i Faalapotopotoga ma Asosi Faigaluega. E taua foi lea vaega e toe faaleleia ai Asosi ia a tagata faigaluega eseese. O lea ou te vaai atu ua ave i ai le foai mo le toe faaleleia o latou. O le taua o le vaega lea, ona o tatou o Samoa o le sui auai o le ILO po o le International Labour Organisation. O lea foi e i ai le latou ofisa o le ILO i Samoa nei, ma le latou ofisa o lenei faaitulagi, o la e i Fiti. A o le mea taua lea ua matauina ua i ai na i fesoasoani ua maua mai i le ILO mo a tatou Asosi ia. O lona uiga e tasi lea auala e maua mai ai foi se isi fesoasoani, mo tatou faalapotopotoga ia, e taua tele. E tasi lava le mafuaaga autu ua faatu ai Faalapotopotoga nei, o le puipuia o aiatau a tagata faigaluega. O se tulaga taua foi lea vaega e pei ona silasila i ai.

E malo faafetai mo le maketi i Otahuhu, ou te talitonu e tasi lea atinae ua leva ona tataua ona fai mai. O lea la ua tino, o lea foi ua matau atu, o le a faatupe e le ACC le faatauina o le nofoaga lea, o se atinae lelei tele lenei atinae. E pau lava le fautuaga, o lea e pei e le o taua mai i le lipoti a le Komiti o Tupe ia le STEC, ae masalo, e pei lava ou te talitonu o lea e i ai ma le STEC i totonu i i, i le taumafaiga ma le faamoemoe lea. Aua e tasi lena Faalapotopotoga a lo tatou Malo o lo o nafa ma faatoaga ma maketi i fafo i le auina atu o fua o faatoaga i maketi i fafo.

Ona o Niu Sila o la e faatu ai, e fia malamalama lou sui usufono lau Afioga i le Minisita, po o le a le faiga la e fai ai, po o lesitala faakamupani le faiga o le tatou faamoemoe lea. Afai foi o faakamupani, a o i ai se Board of Directors, Komiti Faatonu a o ai e i ai? A o i ai ni sui o Asosi o Faatoaga a le atunuu, po o ni sui foi o exporters, o i latou ia o le aufaipisinisi ia o lo o faatauina atu fua o faatoaga i fafo. Ona e taua i lau matau tulaga ia, e manatua foi o Niu Sila e i ai mea totogi o fees faale-tausaga, o rates o a uma mea e tataua ona totogi. O lona uiga e pei e foliga mai o lo o faagaioi faapisinisi. Pe maua se tupe faasili o le faamoemoe lea pe ese foi se faiga o fai ai?

E faamalo o le tatou polokalame foi lea o le computer software o le TIMS. E pei o se software sa tuufaatasia e se atunuu i Europa ona aumai ai lea faaoga e isi atunuu i Asia, ae tasi lava le atunuu o le Pasefika ua faaogaina le software lenei, ua na o Fiti 2 ia tatou. O lea ou te nofo ma ou matau atu i le mea la e tulai mai Fiti, e tele lava faafitauli o la e feagai ma le malo o Fiti i le software lenei. Ae faafetai, o lea ua taoto i le Maota le finagalo o le Malo, e leai se faiga faavae e taofia le TIMS. O le tulaga lena, e pau lava le fautuaga ma le tuualalo, se i toe silasila i faafitauli na e laga mai e private sector e le aufaipisinisi. Aua o le software na ave ifo i Fiti, masalo pe FJD\$900,000, lena na ou vaai atu i ai i luga o faasalalauga. Ae aumai, e fai atu le software, e i ai features la e le o aumaia ai i totonu, i totonu o le software lea o le TIMS na ave ifo i Fiti, o la e faaoga e Fiti. O la e taumafai foi le Malo o Fiti ia, e

tele foi na i faafitauli o feagai ma i latou. Ae ala atu i i se fautuaga, se i silasila ane i le tulaga lea o le TIMS.

Ae faafetai, ua tele lava saunoaga i le tatou vaalele, e le toe agai tele foi i ai sau faamatalaga. E pau lava o lea, o lea ou te matau i lipoti faale-tausaga.

Afioga Hon Lautafi Fio Selafi Purcell: Lau Afioga i le Fofoga Fetalai, ou te tulai atu lava, o le matagofie o le lauga a le sui Taitai, le sui usufono o Anoamaa. O lea ou te talosaga atu, e faaopoopo se isi 3 minute o le sui usufono faamolemole. O le lafo lena ma le faaaloalo.

Faaluaina e le sui usufono mo Sagaga 4 ma le sui usufono mo Gagaifomauga 1.

E le i tuuina atu le maliega autasi a le Maota i le lafo.

FOFOGA FETALAI: Ia faaauau mai le saunoaga, toe 2 minute o le sui usufono mamalu.

Tofa Hon LAUOFO FONOTOE NUAFESILI PIERRE LAUOFO: E momoli atu le faafetai ia i latou na lagolagoina, ia faafetai foi ia i latou e le i lagolagoina. Malo faafetai. E faaauau se tala, o le tatou vaalele, o lea ou te manatua i lipoti faale-tausaga ua uma ona pasia i le Maota, e 8 tausaga e tau mai i le vaitaimi o le misela, ma le amataga mai o le Koviti, 8 tausaga sosoo o polofiti lava ma maua tupe faasili a le Polonesia. E le i lalo ifo i le \$3 miliona i le tausaga tupe faasili na maua. E oo mai i le taimi na aumai ai le tatou vaatele lea e lele i Niu Sila le 737, e leai se tupe a le Malo na tuua i totonu e faagaoioi ai pe aumai ai le vaatele lea. O lona uiga o le tala e leai se capital investment a le Malo na tuua i ai. Sa faaoga tupe a le Polonesia ia, o latou lava tupe na maua ma faapena sa faaputuputu. E faamalo ai foi ia i latou le Pulega i lena vaitaimi, i le pulea lelei o tupe ma le faasoasoina lelei o seleni a le tatou Kamupani Vaalele sa i ai i lena vaitau.

E oo mai la i le taimi na aumai ai le tatou vaa, e faapena foi lou vaai atu i le lipoti lena, i le latou talosaga na ave i le UTOS mo se nonogatupe e faagaoioi atili ai isi vaega o le latou faamoemoe. O la foi sa ou vaai atu o lena foi sa talia foi e le UTOS ina ua uma ona iloilo e le Komiti Faatonu a le UTOS po o le Board Directors a le UTOS. E manatua foi o le UTOS na faatuina ma faavae i se faiga faavae a le Malo ina ia ave i ai tupe a tagata e faafaigaluega ai, ina ia mafai ona nono mai ai le Malo i vaegatupe ia, ia see ese le Malo mai tatou faletupe masani ia, e i ai tatou commercial banks. Ia taatia pea commercial banks ia mo le aufaipisinisi a le atunuu ma private sector, ona e taua ia i latou le access foi i nonogatupe mai commercial banks. Ma o i latou ia sa faalagi o le agent roof o le tatou atunuu. O i latou la na sa o e nono mai i ina, aua a aapa atu foi le Malo i ina, ona tau le lava ai foi lea

o tupe e loan e na i pisinisi laiti ma na i atinae laiti o le atunuu. Ona faasolo mai ai lea, o lau lava la tilotilo malo faafetai.

E pei e foliga mai i saunoaga a Minisita o le Vaalele ma le Afioga i le Minisita o le Civil aviation e pei e foliga mai i lau faalogo, e manaomia le galulue faatasi o le tatou Civil aviation ma le tatou Kamupani Vaalele lea, ina ia maua le laisene, e ui i lea o le a le toe agai i ai se faamatalaga ona o le vaalele ua faafoi. O lea e pei e maua atu, ua faafoi ua le toe aumaia ia le tatou vaalele. Ia ae fonofaapipii foi i le saunoaga a le Taitai o lenei Itu ia se i toe tagatagai i ai. Pe maua se avanoa pe toe aumai se tatou vaalele, atonu foi e le o le kamupani lea ae o se isi kamupani aua o la e tele foi kamupani vaalele i Saina. Afai foi o i ai ni vaalele avanoa i kamupani vaalele i Saina e aumai ai ia se tatou vaalele, ia o mea lelei na. E aumai foi i se isi tau taugofie e fesoasoani i... aua mafuaaga lelei e pei ona saunoa le afioga i le Taitai o lenei foi Itu.

Ia ae o le vaega o lo o taoto pea i ai se ma faatalitali foi i ai se... o le faamoemoe lea, ia o se outcome po o le a se iuga o le a taunuu i ai ia feutagaiga ia e pei ona saunoa le afioga i le Minisita i le faamutaina o le lisi, ia pe alualu ona totogi lea e tatou ni tupe se tele, ia pe leai foi se tupe. Ia talosia, talosia le faamoemoe afai o lenei ua i ai le komiti faapitoa e tagai i le vaega lenei, ia malo faafetai.

E pau lava le mea, ia aua ne i tele se tatou afaina i tulaga tau seleni, ae ia silasila foi lau afioga o lea foi na saunoa le Minisita o Civil Aviation, ia ma le sui foi lea o le tatou PASO o le Ofisa foi o le PASO lea e i... Ofisa tutotonu o le paso lea e tu i Vanuatu, ia ae o le tatou CEO o le Polenisia lea e i ai nei po o le Samoa Air, o ia lenei sa pule i le Ofisa lenei o le PASO i tausaga e tele, foi mai i inei na talosaga i le Pule Sili o le Samoa Airways, ia o lea na ia mauaina ai le avanoa lea. E le o se tagata foi la o pogisa i le PASO ma tulaga o mea o manaomia e le PASO. E tatau ona silafia lelei ia tulaga na.

Ae o lea na saunoa ia le afioga i le Taitai, ia malie ia o lana... afioga o le Taitai o lenei Itu, e toe silasila i le Pulega ma toe review pe o le a se fetuunaiga, privatization o mea uma lava na mo le agai i luma. E pei e faapena se tala e avatu i le vaega lenei ia ae faaiu atu ai lea...

FOFOGA FETALAI: Ia faamaea mai le saunoaga ua uma lou taimi.

Tofa Hon LAUOFO FONOTOE NUAFESILI PIERRE LAUOFO: Ia faafetai, o le faafetai mo le tatou polokalame foi lea i itumalo. O le faaaliga na ou maua ae e le i malolo tatou i le malologa lea na mavae atu nei i le tatou lockdown malolo mai i le tatou Fono, mai i le 51 o itumalo, afioga i sui usufono mamalu o le Maota lenei, e 10 ia itumalo ua maea ona lesitala i polokalame foi lea a tatou lea e i ai le \$200,000. E aofia ai ma itumalo o lenei itu lea ua uma ona lesitala. O le isi 10, o la e faagaioi ia le lesitalaina.

E aofia ai la ma le itumalo o lou sui usufono ia ma isi foi itumalo o lenei itu o le Maota.

Ia o lona uiga, totoe ai lea o le 31 o itumalo e le i faagaioia se mea. E pei o le faaaliga lea na aumai. Ia o lea la ou te matau atu i le toaitiiti o lenei itu ma le toatele o lona itu, o lona uiga e pei e foliga mai, o le toatele o le tou itu, e le o lesitalaina mo le faamoemoe lea. Ia e pei o se vaaiga lona ona o le faaaliga ua maua mai, ae o lea ua faagaioi ia le tulaga lea, faafetai Hon Minister of Agriculture ona o lea e te tulai soo e pei e tau le pua ma lafo mai, ia ae o lea ua e faafofoga mai e pei o le faaaliga lona o le toatele o le itu lenei o lea ua i luga ua on board. Ia ae malo faafetai i le faamoemoe, talosia ia taunuu ia aua ne i i ai nisi mau faafitauli e tulai mai i le faagasologa.

Ae faafetai mo le pepa lea. O le pepa la lea na maua mai i le Matagaluega, faamatala uma mai ai lava ia le polokalame lea e \$200,000 a, maumau pe ana vave maua mai ia le pepa lenei semeamanu e leai lava ni fesili e tele ma ni tala e fai i le polokalame lenei. O lea ua manino faafetai, ae o le faalavelave faatoa maua i le vaiaso atu i tua le pepa lenei. O lea la ua manino uma ai isi fesili o lo o fesiligia e le toatele o le atunuu e aumai ai ma tali.

Ia o lea la ua matua manaia tele ia le tulaga lea a manino lava ma malamalama se mea, ia e leai foi ni fesili. A o lea aua o le isi fesili lea e aumai i i, ia pe i ai se vaegatupe e tuu sao atu i itumalo? Ae o lea e aumai le tali e leai. Ia vaai o lea ua malamalama o lea ua manino lea tele tagata e fesili i lea fesili.

FOFOGA FETALAI: Ia na ua malamalama le fesili.

Tofa Hon LAUOFO FONOTOE NUAFESILI PIERRE LAUOFO: E i ai foi le isi fesili lea fai mai, pe faaoga ai tupe nei i auala galue? Tali leai, ia vaai la matua manaia lava.

FOFOGA FETALAI: O le mea sili na ua...

Susuga Hon Laauli Leautea Polataivao Fosi: Lau Afioga i le Fofoga Fetalai pe maua se avanoa...

FOFOGA FETALAI: Ia, ua tau faaiuiu le... ia tulai mai lau afioga i le Minisita o Faatoaga.

Susuga Hon Laauli Leautea Polataivao Fosi: O le a fai atu ia le tali faaiu, e malamalama ai le sui usufono. O le sui usufono mamalu foi ua leva tele ona saunoa i lenei mataupu. Ma o lea e iloa uma e le Maota saunoaga na fai. Ae faafetai i lenei taeao o lea ua e tautino e sese uma mea ia na e saunoa muamua i le Good morning Samoa ma le fesiligia o le poloketi.

O le pepa lena e te taulimaina ua leva ona fai. Ma e te alu atu loa e ave ia lau lesitala i le Matagaluega, aumai loa le pepa lena e mulimulitai ai ia tatou mea na fai. Ae faafetai o lea faatoa maua ia lau pepa i le vaiaso lea na tea atu nei, ia ae ua atoa le tausaga o e sasa e le tupu le poloketi. Ia ma e saunoa e fesiligia, e fesiligia e faafefea pe faafefea, ae faafetai, o le a le toe alo i tua se tala. O taulumaga na ma o faamoemoga na fai atu, agai lelei e lesitala, pau lava le mea lea na fai atu, e fetuunai ona o le manatu o le faigamalo e le tatau ona taitaifono se tagata e lalamua e tetee i le poloketi. That was the only thing, ae o lea ua matau atu o lea ua liliu atoa lou sa vaai la i le manaia tele. O le mea lena o lea e manaomia.

Faafetai foi i le saunoaga a le Taitai leaga o lea ua tuumuli atu la outou Taitai, o le mea lena e tatau ona tou mulimulitai i ai, tulai mai loa e lagolago, omai e fai faatasi. Ua lava ia le tatou mea lea e fai o le taaalo, it's enough. O lea ua maua le atunuu i le faamai. Ia ae faafetai mo le poloketi o lea ua e saunoa, ia e le tau lesitalaina ia le itu lenei. Ua malamalama uma i le poloketi. E tasi lava le aso e lesitala ai uma uma, ae o lea e faatalitali atu pe usitaia ma talia e lena itu, ia obey and ma mulimuli mai. Ia ma le agaga faaaloalo.

FOFOGA FETALAI: Ia malo, ou te iloa o lea ua manino lelei ia le saunoaga a le Minisita o Faatoaga ma... ia

Tofa Hon LAUOFO FONOTOE NUAFESILI PIERRE LAUOFO: Lau afioga i le Fofoga Fetalai e sao lelei, e le i ai foi se manatu e toe alo i tua i le ogasami lea ua foi mai ai, o la ua taoto. Ia e mai lava i le amataga e manino lava. E leai lava ma se isi na tetee i le polokalame. Ia pau lava le mea sa fesiligia ia tulaga ia. Ia vaai la i le manaia o le pepa lea. Ia o lea faatoa maua foi e lenei itu i le vaiaso atu i tua.

Ia o lea la ua malamalama lea vaega, malo la faafetai. Ia o le a lesitala pea le matou itu, ia ae le afaina o lena ua e saunoa e le tau lesitalaina le tou itu.

FOFOGA FETALAI: Ia faaiu maia le...

Tofa Hon LAUOFO FONOTOE NUAFESILI PIERRE LAUOFO: Lau afioga o le a faaiu atu, ua maea foi manatu sa talanoa i ai e tusa ai ma le tatou Tala Faaopopo o le Tupe.

FOFOGA FETALAI: Tuu atu lava le avanoa ae faaiu maia.

Tofa Hon LAUOFO FONOTOE NUAFESILI PIERRE LAUOFO: Faafetai i lau afioga. Ia o le tatou tui, ia o lea ua maea ia tatou tui e lua. O le tele lava o isi tagata o le atunuu ia o le a se tala mai i le tatou Booster o le

tui lea lona tolu? Ia aua o lea e pei e maua muamua ia le tatou frontline health workers. Ia ae o le a se fuafuaga se faamoemoega i le lautele o le atunuu?

Ia faapea foi ia le tui lona fa, ia aua o lea ua vaavaai atu i isi atunuu i luga o TV ua alu le tuiga lona fa o isi atunuu. Ia ae o le a se polokalame i le agai i luma o tatou? I lea faamoemoe ma o le isi tulaga e pei foi ona saunoa le afioga i le Taitai. Pe o le a se tulaga faataatia mai e le tatou Kapeneta ma le Komiti i tulaga foi i ni tatou testing station?. Pe a faapea o le tulaga lea ua salalau ia le siama.

FOFOGA FETALAI: Ua maea ia le taimi o le sui usufono.

Tofa Hon LAUOFO FONOTOE NUAFESILI PIERRE LAUOFO: Ia ona maua ai lea o ni avanoa e o ai ia le mamalu o le atunuu e test i vaega ia. Ia ae o lea lava e i ai le tulaga foi lea i le fesili i le sao mai o le pasese lenei ua aafia i le siama. O lea la e avatu ai se fautuaga i le afioga i le Minisita, ia se taimi o muamua, aemaise le afioga i le Minisita ma le tatou Kapeneta ia faapea foi ma le Komiti faapitoa o le NEOC, ia aumai ia se tatou lipoti i luma o le Maota se i faamatala auiliili ai ia nisi o... ia o lo o tuufesilisili foi ia le atunuu i le mafuaaga ua oo mai ai le faamai ia ma sao mai ai, ae o le a foi se fetuunaiga o tatou faiga faavae? Aua e tasi lea o taua o mea faapea e iloa ai o i ai ni mea faaletonu, ia ona toe fetuunai lea o tatou faiga faavae, ina ia foia ai ma puipuia malu ai ia le tatou atunuu i tulaga faapea pe a tulai mai.

Faamanuia le Atua i lau afioga i le Fofoga Fetalai, ioe, maua pea le tofa aua le faafoefoaina o le Fonousu a le atunuu. Ia maua foi se finagalo ma se tofa i le afioga i le Palemia, Sui Palemia ma le aiga Kapeneta ma lena itu o le tatou Maota. Ia alofagia foi e le Atua lenei itu o le Maota maua so latou finagalo lagolagosua ai e faatino ai le matou pitolaau.

Ia aua i le matou talitonuga, e le mafai lava ona tuua ia le faatinoga o le matou pitolaau, e tatau lava ona faatino o la e tapuai ia le atunuu. Ia agalelei le Atua i le tapuaiga i tatou Faauluuluga o Matagaluega ia faapena ona maua le latou malosi aua le nofotuavae aua le tautuaina o le tatou Malo ia ma le atunuu. Ia faapea foi Samoa i ona tulaga faalupe, ia faapena ona manuia la tou tapuaiga ae ou ola, faafetai.

FOFOGA FETALAI: Ia malo, o lea ua aumai fautuaga, ia malo lava. O lea ua faafofoga ma le totoa foi ia le Maota, ia ma le tulaga i fautuaga, ia o lea ua uma ia fautuaga a le Taitai ia sau ma le fautuaga a le Sui Taitai, ia ou te iloa ua lava ma totoa i le faafogafogaaga a le faigamalo.

Ia ona o lea na tuu atu le avanoa i lau afioga, ia o le avanoa lenei mo le sui usufono mamalu o Lefaga ma Faleaseela. Ia saunoa mai lau afioga i le sui usufono mamalu, le Minisita Lagolago.

Afioga MASINALUPE MAKESI MASINALUPE (Lefaga ma Faleaseela): Ia e momoli le faafetai i le afioga i le Fofoga Fetalai, ia e tusa ai foi o le avanoa ua tuuina mai. Sa nofonofo lava ma le agaga faaaloalo i lenei taeao, ona sa i ai lava le talitonuga o au e tataua ona amata i le taeao lenei ona o lea ua ave le faamua i o i le la vaega i le vaiaso ua tuanai. O le Komiti lenei o Tupe Maua ma Tupe Totogi, ae peitai o la ua ave le faaaloalo i le Taitai o le Itu Agai ia po o le Sui Taitaifono o lenei Komiti.

Na ou manatua ai le upu foi lea i le Afioga Paia a le Atua e faapea, 'e te alofa atu i le Alii lou Atua ma lou loto atoa, lou agaga atoa ma lou manatu atoa'. O le poloaiga muamua lena ma le sili. Ae faapena foi i le lona lua, 'e te alofa atu i le lua te tuaoi, ia pei o oe lava ia te oe'. E faapena le agaga o lenei sui usufono i lenei taeao.

O lea ua maea le Taitai, toe sosoo atu ai ma le Sui Taitai, ae sa ou manatu e felafuai foi lea le tatou galuega, e manaia.

Afioga Sulamanaia Fetaiai Tauiliili Tuivasa (Vaimauga 1): Lau afioga i le Fofoga Fetalai, o sina mea e fia faasao...

Afioga MASINALUPE MAKESI MASINALUPE (Lefaga ma Faleaseela): Ia ona i ai lea o le talitonuga,

FOFOGA FETALAI: Malie le sui usufono mamalu, se i tulai mai le sui usufono o Vaimauga 1 pe i ai se mataupu ua uma ona e lauga.

Afioga Sulamanaia Fetaiai Tauiliili Tuivasa: Ioe, o le sui usufono lenei o Vaimauga e tumu i le faaaloalo. E matau atu i le saunoaga a le sui usufono lea, e pei o la e faatonu ia le Nofoa, i le tuuina o avanoa. E pei o le agaga lena e fautua atu ai i le sui usufono. E le mafai ona tu atu matou toe ave i ai le avanoa. E aumai le avanoa mai i luga i le Fofoga Fetalai.

O le mea lena o e popole le sui usufono lenei, e ava tele i le Nofoa lau afioga. O lau afioga e faatagaina tagata e saunoa, ae o lea e matau atu ua faasea le sui usufono lea. E pei o si agaga lena e tulai atu, e le tio foi e fou le sui usufono.

FOFOGA FETALAI: Faafetai, malo lava le fautua, atonu e aoga foi fautuaga lea e aumai e le sui usufono mamalu mai Vaimauga 1. Ia o le mea lea le sui usufono mamalu, o le avanoa mo le tou Komiti ae taatia ia le itu lea e te agai i ai.

Afioga MASINALUPE MAKESI MASINALUPE: Faafetai lava, e maua lava i le sui usufono lea e tele lava ina faalavelave i le taimi ou te tulai ai. Ae e i ai foi lou talitonuga, sema pea sou taimi. Ou te le o faatonuina foi le Nofoa.

Ia tapuai mai se i fai ia le lauga a Lefaga ma Faleaseela. E ta matasila lava ia le agaiotupu ae popoe ai ma atugalua ia le taufalemau, ina ne i sala utouto le upega ona le tau lea o ai o le faamoemoe.

O le a ou le toe sala utuutu e pei o atu o Malo. Ou te le toe filitamusaina foi le maualuga o lenei taeao na liugalua. Ae o le upu lava e fai i le Maota o le Tuiatua na i le mata Aleipata, fisaga lava i matagi o le moe ae lilia lava i Matautu o le solo. Aisea? O lea ua malumaunu le Maota i Tiafau nei i ona muliauma faalupe. O le eleele sa faufau ai tia o le tofa ma le faautaga i tupu ma tamalii tainane ia faleupolu tofia, o e sa latou asaina ia le gasu o le taeao. O i latou o e na masaa le toto ona o le taumafaiga o si o tatou atunuu. A lea ua lagomau mai i tiasa, a o lele ua aoina Samoa e ala i le Talalelei.

Ou te manatu foi i lau afioga i le Fofoga Fetalai, o le taeao muamua lava lea o le Talalelei na toai taunuu i laufanua i le afioaga o lo o e alaala ai. O le taeao na i Mataniu Feagaimaleata, o le taeao e taulima e Manu ma Siuafanua ae tu ai le lauga a Safotulafai, tootoo o Fuifatu. O le taeao foi na i Faleu ma Utuaniani, o le taeao e taulima e Futi ma Auuapaau, ae tu ai le lauga a Leulumoega ma Nofootoo. O le taeao foi na i Malaola ma Gafoga, o le taeao e taulima e Tevaga ma Vaifale, ae tu ai le tootoo o Saleaula, tootoo o Vaituutu.

O taeao na i Sinave ma Ulumotootua, e taulima e Faletolu ma le Vainalepa, ae tu ai le tootoo o Tuisamau. Ae o se taeao fou na suluia ai eleele o Lefaga ma Aiga, Aiga Sa Tuala ma latou Tama, Taulagi ma le Matua, e taulima e Gagaeolo, Leitu ma le Faleaana, ae tu ai le tootoo o Tuisavailuu o le Tulatoa. O taeao na o lea ua sapi ai lo tatou atunuu.

O lea sa e malele ma saunoa i le taeao ua fano, e tusa ai o se tatou taulaga momoli i le Atua aua si o tatou atunuu ia faasoina aua le feagai ai ma faamai. Ia ua faaifo lava la le faiva o le tamaitai e pei o faiva i le tai. A ua lafo foi i liu le atu a le tautai matapalapala, a lea ua e faasao le tumu o le tavaesina. O lea sa e malele ma saunoa, ma momoli lapalapa o malo i le Atua ona o lona alofa ma lona agalelei. O lea ua logoitino matagi lelei ae ua taliga fialogo foi le mauga na i Salafai, aua lenei aso ma le momoliga o tatou manaoga i le Atua, aemaise o le tatou faafetai ma le tatou faatoesega.

Ia o le ala lea o le malaga a le manutupapa aua o lea ua faaifolalago le folasa a ua liligo foi le fanua i le paia maualuga o le Maota lenei. Ou te faatalofa atu ai ma ofo alofa atu ai i lau afioga i le Fofoga Fetalai, faapea foi ia le Sui Fofoga Fetalai. Ia ou te faatalofa atu foi i le afioga i le Tamaitai Palemia, lau Afioaga i le Sao Faapito, lau afioga i le Sui Palemia, lau afioga i le Saoalii, faapea foi le afioga i le Taitaifono o le tatou Vaega Faaupufai, le vasega o alii ma tamaitai Minisita o le Kapeneta, faapea foi ona ou faafetai atu ma ou faamalo foi i le afifio o Sui Minisita.

Ia liliu i lena itu o le tatou aupele, ia ona o lea ua le nofoia ia le nofoa o Tavita i le Taitai o le Vaega Faaupufai i lena itu. Ia lau susuga i le Sui Taitai,

ofu alofa atu ma faamalo atu ia aemaise le maualuga i sui usufono o le tatou Palemene.

Ia e faapea foi ona ofu alofa atu ma faatalofa atu i le Failautusi o le Fono, aemaise o le aufaigaluega, malo faafetai.

Ia o le tapuaiga a le Ao o le Mamalu o le Malo ma le Masiofo, Sui o le Fono a Sui Tofia ma le Faletua, le Faamasino Sili, le Ofisa o le Faamasinoga. E le gata i lena o Ofisa Sili o Pulega o Matagaluega a le Malo ma Faalapotopotoga Tumaoti, momoli atu le faamalo ma faatalofa atu foi i lenei taeao na liugalua.

O paia o Samoa i Sisifo ma Sasae, o le a nuunuu faatini o tausala, aua e i ai le talitonuga e leai lava se vave, leai foi se poto na te faaopoopo pe toese le atoalio o le masina, o lea ua maea ona tosilaui ma mamalu faatiti e le autulatoa ma le aufueloaloa o le atunuu.

Ia lou itumalo e o Lefaga ma Faleaseela, e le mafai lava ona alu loa le vaa, e afe atu i la outou tapuaiga. Ou te faatalofa ma ofu alofa atu i Susuga i Faafeagaiga taulagi uma o si ou nuu o Matautu. O faafeagaiga taulagi o le Aiga Suafa, Lemalu ma Le Mamea ma lo oulua fale na luafua. Alaalatai le mamalu ia Savealii.

Faatalofa foi ma ofu alofa atu i faafeagaiga taulagi uma i si ou nuu o Gagaifoolevao, le Susu o Sua, Afifio o Faumuina ma Tuaepepe, Susu foi Tolumaanave, Laulu ma Manua.

Faatalofa foi ma ofu alofa atu i Susuga i faafeagaiga taulagi i si ou nuu o Savaia, le Afifio o Fui ma Malama, Afio Tusani ma le fai aao, Alaalatai ia le mamalu ia Leatialiifaiga.

Faatalofa foi ma ofu alofa atu i si ou nuu o Tafagamanu, le Afifio o Tuala Tamalelagi, Afifio Leapepe, Susu foi ia Afumatino ia ma le matua ia Lepale, alaalatai Sa Iauta.

Ia ona ou oo atu i si ou nuu pele o Safaatoa, faafeagaiga taulagi aemaise nai ou matua faaleagaga le Susuga i le Toeaina, le Susuga ia Nomeneta Simanu ma le faletua ia Taua. Ia o paia lava lea aua le afifio o Aiga Sa Tuala, le Uso ma le Ailaoa. Lau fetalaiga Tuisavailuu lau Tofa Tumaiva le Tafai paia, lau Fetalaiga Masinalupe ma lou Tulauniu, lau Tofa Finau o le laau na faufau e Aana, Lau Tofa Fiauvaa o le Tapufanua, Alaalatai le nofo a ituaiga

Ia ou te faatalofa foi ma ofu alofa atu i si ou nuu o Faleaseela, le Afio o le Taulagi ma le Matua o Satuala. Alaalatai ia Pou e fa o le Faleaana, tagata o le Vavau.

Ia ina ne i misi ia te au si ou nuu o Tanumalala, e tasi lenei nuu e faaleiloga ae o le nuu e taua, ae o i le nuu lea na tanu ai le pute o le tama. Ia i ou faalupega, Afifio o Aiga, alaalatai Tootoouli ma Tootoosinasina. Ia Susu o lau Susuga i le Faafeagaiga Taulagi, tapuai maia se i fai se sao o le itumalo ia aua le Tala Faatatau Faaopoopo o le Tupe.

Ou te muai faafetai lava i le afioga i le Tamaitai Palemia aemaise foi o le Komiti o le au sinia o lenei Vaega Faaupufai i le filifilia o lou tagata e avea

foi ma sui o le Komiti o Tupe. E talitonu o lenei Komiti o le fatu lenei o le atunuu aua le fuafuaina o tatou seleni. E matua lagona le loto faafetai, o le galue foi e ui lava e na o le Atua e na te silafia mea uma, ae o lo o galulue ma le faamaoni. Ia i lenei itu e pei ona i ai foi le Sui Taitaifono ia faapea foi nai tama sinia o le matou Komiti, e momoli atu ia le matou faafetai tele, faafetai mo le tatou galuega. Faafetai mo le lavapapale.

O lou lava talitonuga i le tatou mafutaga e tatou te le i faitau eseese lava ma faapea e ese lea vaega ese lenei vaega. O le tatou galuega na faatino, tatou galulue lava mo le lelei auiluma o le tatou atunuu. E pei o le mea lea o le auga lea o aute sa tatou galulue i ai, ia e le tau selu atu i tou faiva, malo faafetai le galulue.

E le itiiti foi se faafetai i Ofisa Sili o Pulega o Matagaluega eseese na o tatou mafuta. E leai lava se mea na lilo i lo outou folasia uma i lumamea tulaga na i ai ina ia talafeagai le faasoa aua le agai i luma o si o tatou atunuu. O Matagaluega eseese o lea lava ua maea ona faatino.

Ia momoli foi le faafetai tele i le Failautusi aemaise foi o le Ofisa o le Fono, aua le faamaumauina i lalo ia o finagalo faaalua aemaise foi o le tau lufilufiina faasoa mo le tatou Tala o le Tupe Faaopoopo.

Ia e i ai lava nisi e le umi, aua e pei lava ona molimauina foi e le tele tele se laupepa o lenei Tala Faaopoopo. E pau lava lea na ona ou toe oo i le tulaga e pei ona i ai le vaega lea, o nai mea lava sa toe tau faamanatu o mea foi ia sa logologo mai foi e si o matou itumalo, o le vaega lea i le tulaga o le aufaifaatoaga vaeatu lau afioga i le Minisita.

O le mafatiaga o lo o i ai nei si o matou itumalo se i tulou lava le Maota, o le tele o le manu faalafua. O le tele mo le mea o le puaa aivao. O le taimi nei o si o matou itumalo sa malosia i le lauina mai o le talo. O le taimi lenei, ua tele le faaletonu. Ua le mafai ona taofiofia le tele o puaa aivao se i tulou e faatamaia faatoaga. Ae e le o ni tamai faatoaga, o le matua tetele lava o maumaga.

O le talosaga e alofagia le faafitauli lea pe e i ai se auala e foia ai. Ia aua na i ai lava i sou vaivaiga, pe gafatia ni pa e pai ai uta e poloka mai ai puaa aivao. Afai e le o lea, pe maua sina avanoa i sina helicopter foi lea e hire mai, ae faaoga la i ai ia tatou tama ia e o i le mea foi lea o le tauvaga foi lea mo le shooting, lea e lelei ia latou fana, ou te manao e faaumauma lava. Atonu e aoga foi e aumai e amata ai ona fai ia se tatou fale fasimanu, ia e moi e faaoga ai ia... o nai lagona lava ia i tulaga ia leaga o le matua mafatia lava o le itumalo lenei. Ua toe faatino ia faatoaga i tafatafa o tuamaota ma tualaoa ona o le tulaga i le mafatiaga lea e pei ona i ai.

Ia, ona ou oo mai lea i le tulaga e pei ona i ai le...

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Ia, se i fai mai sau malologa se i tulai mai le Afioga i le Minisita o Faatoaga.

Susuga Hon Laauli Leuatea Polataivao Fosi: Ona o le taua tele o le saunoaga a le sui usufono mamalu, ua ou manatu ai e avatu le atoatoaga pe a ou tali atu faa-Minisita ona e le laitiiti le faafitauli lea ua tulai mai ua soo le atunuu. O lea foi ua saunoa, o lo o ua i ai nei faatalatalanoaga a le Matagaluega a le SROS o lo o ua taupule ai mea nei o traps mo mailei tetele nei ua amata ona faatulaga e fau mailei eseese o la e faatulaga po o le a le ituaiga tetele o le a foi pe fia puaa e ofi i totonu ma mea uma faapena. O lo o i ai foi le isi fautuaga e aumai le mea lenei o le fualaaui foi lenei e faaonana ai puaa. O le tasi lena fautuaga o lea ua aumai.

Ia ma le fautuaga mulimuli lea ua aumai, e sauni sau pepa e ave i le Kapeneta e sauni tatou leoleo e matua alu lava le tulaga e o e tutuli, e faaoga i ai tulaga ia tatou te i ai, e le gata foi i le suega o laau faasaina, ae o lo o i ai le squad faapitoa lea e i ai a leoleo lea e tau agai mai ai le saunoaga a le sui usufono. Ae o le a ou faamalamalamaina auiliili le taua o le vaega lea... Faafetai o lea faatoa pau lea o se sui usufono ua laga le faafitauli o lea e tagi mai ai le aufaifaatoaga. O le a ou tali manino atu ai pe a maea.

FOFOGA FETALAI: Malo. O la ua saunoa manino le Minisita, o lea o le a tapena mea uma aua lou fanoga lau Afioga i le sui usufono mamalu. Ae faaauau mai le saunoaga.

Afioga MASINALUPE MAKESI MASINALUPE: O lea la ua... a o outou faafofoga mai si ou itumalo, o lea la ua matua manino lava le vaega lea, o lea foi la ua maua le toafilemu. Aua ou te talitonu lava... ou te le tau selu atu, tasi lea Minisita e ui ina tino lapoa ae ese le galue. E matua pei o le... ia, e faapena foi i le... e feoloolo le Sui Minisita.

Ia, ona ou oo atu lea i le tulaga e pei ona i ai laau faalafua pei ona tele ina... sa saunoa i ai le MNRE. Sa ou faailo ai foi le tulaga lea i le laau lea o le faapasī, ua matua tele le laau lea i tua ia matou. Ae pau o le mea ua toe foi mai ai sou taofi i le vaega lea, ona o le laau lea o le faapasī, o lea ua iloa nei, o le matua fiafia lava i ai o le manupapalagi. O lona uiga la e leai se mea o le a taumafai ai e tineia ona o lea lava e tulaga lelei ma aoga mo nai lafumanu.

O le isi tulaga sa faaoo mai foi se finagalo foi i si o matou itumalo, e uiga lava i le Matagaluega a le Minisita o Leoleo faapea foi Faamasinoga, i tulaga lava ia o moliaga foi ia e le tetele tele, ae ua fia tausaga o taatitia ai e le aveesea faamaumauga o i ai. O le aafiaga e pei ona i ai le vaega lea, ona ua toatele lava nisi o nai tupulaga ua atoa le... ua ova i le 10 tausaga o i ai lava nai moliaga i le Ofisa o Faamasinoga, a o la e lava e o atu e fai latou police

report o la e lava e mau ai. Na ona tuu atu i ina, po o le a se fuafuaga mo ni tausaga e aveese ai lea vaega.

Oo atu lau... i le tulaga e pei ona i ai i galuega faavaitaimi. O le tulaga e pei ona i ai le vaega o lo o agai atu i Ausetalia, i lou talitonuga ua fai si umi o le taimi. O le 2 i le 3 tausaga o se taimi umi tele, pe a fua agai i ai i le faamalieina o kamupani i fafo e le talafeagai ai ma si o tatou atunuu. O si o tatou atunuu foi aemaise ona tagata a umi foi se mea o faigaluega ai, ona amata loa lea ona i ai le agaga ua fiu, ia fai ae loa ma le mea faaletonu, ona tauvalea ai lea o aiga, nuu aemaise foi si o tatou atunuu. Ae se i toe seu silasila ia faamalieina pea. E pei o lea lava e manaia Niu Sila, e 7 lava masina ma toe omai, toe timata le upega ma toe foi atu, a o la e lava o lo o i ai nai fautuaga.

Ia, e pei e foliga ua lava lea vaega e pei ona ou taua i le matou Komiti. Ae pau lava lea na ona toe faamanatu. Ia o le taimi lenei, ou te talitonu na o le tatalo faafetai ma le tatalo o le faatoesega.

Na ona tatalo atu foi, o lea ua maua se mautu mai le Afioga i le Minisita o le Soifua Maloloina, a o lea ua uma ona logo mai o lea ua faataatia atu ma e mautinoa lava le mea lea o lo o naunau i ai, o se falemai o si o matou itumalo. Ona e pei lava ona ou taua i lau lauga faa-taupou, pau lava lea o le agaga, e tatau lava ona ave le faamuamua i mea o le soifua maloloina, aua tatou te oo uma lava i ai, e faigata tele le feoi mai i Leulumoega, faapea foi le agai i Safata. Ae a i ai lava se falemai o Lefaga ma Faleaseela, ia viia le Alii.

O le tulaga foi e pei ona i ai le Minisita mo Galuega Tetele...

FOFOGA FETALAI: Ia, se i malolo mai lau Afioga i le sui usufono mamalu se i tuu atu le avanoa i le Minisita o le Soifua Maloloina. Ia, lau Afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: E faasaoina le taimi o le... E leai se agaga e faalavelave i le lauga manaia ma le matagofie a le sui usufono mo Lefaga ma Faleaseela. E le i i ai se taimi na fai ai se ma tala ne i meaane ua tuuina atu lea i le Pulega ma le Matagaluega, ae leai se agaga e faalavelave, aua ne i alu lona taimi e talanoa i le falemai, ae leai se vaegatupe, o lena e te silasila i le tatou Tala o le Tupe Faaopoopo. Ia e leai se vaegatupe a le Soifua Maloloina. Ou te le tali foi la i ai, ae faatoa ou tali lava i le Tala o le Tupe Autu.

Ae o lau tatalo, aumai tusi talosaga ona tali fuafua lea i ai i le tulaga lea. Malie lau Afioga. O le sui usufono foi lea sa tatalo mai i se falemai ma se taavale, ae ou te talitonu, e leai, aua ne i faaseseina le itumalo i le saunoaga ne i meaane ua... Ae atonu a uma le 5 tausaga lenei o i ai fuafuaga, ia, talosia le ola, talosia le ola. Ae onosai le sui usufono aua e te popole o lo o ua i ai lava polokalame faataoto mai e le faigamalo talu ai, o lea lava e sosolo, o la

e tau iloga ai le igoa o Lefaga ma Faleaseela. Ae ia manino, aumai le tusi ae leaga le talanoa i tulaga foi ia pei ona faaali atu, ae ua leva ona fai atu e aumai le tusi, saina ai toeaia ma le fanua ia manino e tu ai le falemai, aua o lona sa i ai.

Ia e pei o le agaga lea lau Afioga i le Fofoga Fetalai, ina ne i mea ua taitaiseseina le Maota.

FOFOGA FETALAI: Faafetai. Ia, malo foi lava le fesoasoani i le saunoaga a le sui usufono mamalu. Ia, lau Afioga i le sui usufono mamalu, o la e ua saunoa manino le Afioga i le Minisita a o faafofoga le itumalo.

Afioga MASINALUPE MAKESI MASINALUPE: Malo faafetai. Ia, e saolele lava le Minisita, o le Minisita foi lea e savali lava i ana upu. Ae na ou talatalanoa lava ma ou faamatala, o le ta talanoaga. A o lea sa e saunoa e fai le tusi, o la e ua amata ona fai le tusi, o lea foi ua i ai le fanua e fai ai le falemai. O le naunautaiga lona, ae faafetai. Faafetai. Afai ae tino mai i le taimi o e tulai mai ai o le Minisita, oka, o le matua faamanuia lava o le Atua ia te oe.

Ia, ona ou oo atu lea i le tulaga e pei ona i ai mea foi nei o tauofoga i mea o tenders o taavale foi nei a le Malo. Ia o le fautuaga lava mai si o matou itumalo, e i ai lava nai toeaia faifaatoaga na omai ma latou... nai toeaia faifaatoaga foi nei e taga mai lava pe nonoa i le ie se i tulou le \$15,000. Tusa la e sau i i le taimi lea e faatino ai le tender, e na o sina fautuaga, pe mafai ona vaevae foi lele i le tulaga i le tagata e maua le seleni e ono maua ma nai faifaatoaga. Aua o le mea lea o le a tele ai lava taavale a tagata mautupe, ae o lea e manaomia lava e nai tagata faifaatoaga sina taavale e aumai ai fua o faatoaga. E pei o le agaga lona ona o le faitioga lava lona, e fiu lava e omai, ia e le maua lava se taavale i lea tupe. Ae ou te talitonu foi o taavale ia, o taavale lelei. Aua pei na o le maa lava o le taavale ua aveese, ia po o a nai isi mea laiti o lo o i ai, ae faaoga e avatu, o la e afford e le faifaatoaga ona faatu le maa. Aua o le popolega lea e i ai, o le a maua e le tagata e tele tupe, aumai fai lelei, a o taavale... a faapea o lea e maua i le \$30,000, a uma ona fai lelei ona toe faatau lea po o le \$80,000, aua o ituaiga taavale lelei.

Ia, o le mea lona o lea e... ae se i tau fuafua ifo lea vaega ina ia faeseese le tulaga o le tamaoia o lea tagata ma lea tagata, aemaise o nai tagata o lo o manaomia le fesoasoani.

Ia, ua lava lea, ona e le o nofo mai le Minisita o Galuega Tetele, ae na ona toe faamanatu atu o le vaega lea. E ui lava o le Tala Faatatau Faaopopo o le Tupe, ae se i toe oo foi i le Tala o le Tupe Autu ona toe... a o le tulaga lava lea e pei ona i ai. O lea e faafofoga mai si ou itumalo, ia o le auala lava lea o lea e manaomia le alu atu i i Faleaseela e alu atu taamilo atu sau mai Matautu ona e le o mafai ona... a malaga mai Matautu e toe foi atu lava le taavale i i po o le pasi toe alu i Matautu e sau ai. Ae o le agaga lea e i ai, a

ua sau loa sau ai lava i uta i ina i Faleaseela. Ae atonu foi o le auala lava lea e i uta i Faleaseela ua tele ina fia me i mai i ai nai tagata i tai i le aai ona o faalavelave la ia faalenatura. Ae ou te iloa a i ai se auala, o lona uiga ua nofoia uma foi lea vaega e si o matou nuu o Faleaseela, ia atoa ai ma le faigofie ai foi o femalagaaiga.

Ia o le talosaga mai foi i tai i si pitonuu lea i tai i Matafaa lea e alu i tai, ia ua tele lava le faaletonu o le latou auala, ia ma nai auala galue ia o si o matou nuu o Safaatoa, faapea foi Tafagamanu, ia ma le auala faaauau lea e alu i tai i Matautu. Ia o lona ua taatia i ina, ae na ona pau lea o le tulaga e toe faamanatu atu.

Ia, ina ne i te i ua misi ia te au le vaega lea i tai i le Parataiso, i le tele o le ogasami lona e i ina sa talosaga mai pe mafai ona fai ai se latou faasao ona o le tasi lona vaega tele e ono fai ai se faasao, e fesoasoani foi i le toe atiaaina o le amu atoa ai foi ma nisi o fuafuaga o i ai.

Ia, e pei o le talanoa atu lea, ae alofagia lau Afioga i le Fofoga Fetalai, ia maua le tofa, utupupuina fulu o le segaula aua le tofa faale-Atua i le feagai ai ma ou tiute fai.

Ia alofagia le Afioga i le Tamaitai Palemia, maua sou finagalo, maua lou lototele aua le feagai ai ma ou tiute ma faiva. Ia faapea foi i le Sui Palemia, ia alofagia e le Atua ia maua pea se manatu e lagolagosua aua le feagai ai ma le atiaaina o si o tatou atunuu. Ia, le vasega o Minisita o le Kapeneta, ia maua le malosi i le tino, le mafaufau ae faasilisili le agaga e mafuta ai i le Atua. Ia alofagia foi Sui Minisita ia maua lo outou malosi.

Ia liliu i lona Itu o le malu, ia alofagia le Taitai o lona Itu ia faatumauina le malosi, maua foi lou malosi aua le feagai ai ma le taitaiga o la outou Vaega. Le Sui Taitai ma sui usufono uma o le Palemene, ia tatou maua le fealofani, aua tatou te toe galulue tusitusilima, ae tatou galulue ina ia atiae si o tatou atunuu. Aua o le mea lea e tupu i le tagata e faafitauli, ia o la e fia fonu, ae pau o le mea ua i ai lape. Ia manuia le tatou fonotaga. Faafetai.

FOFOGA FETALAI: Ia, ua faamalo saunoa i le sui usufono mamalu mo Lefaga ma Faleaseela. Ia faafetai o le mea sili o lea ua faailoa mai i le Maota, aemaise foi o manaoga o si ou itumalo, aemaise lava le aufaifaatoaga ma tatou nuu, malo lava. O lea ua maua lelei e le Afioga i le Palemia ma le Kapeneta ma le faigamalo manaoga uma o le itumalo, aemaise foi manu faalafua nei o puaa aivao, ia, measili o lea ua faafofoga i le saunoaga a le Minisita, o se taimi foi saunoa manino i ai. O le mea lea e momoli atu ai le agaga faafetai mo le saunoaga.

Ia o le taimi lena o le toe sui usufono lea o le tatou Komiti, o le sui usufono mamalu mo Faasaleleaga 2, ia o lou avanoa lena lau Afioga i le sui usufono mamalu.

Afioga MAGELE SEKATI FIAUI (Faasaleleaga 2): Lau Afioga i le Fofoga Fetalai, faafetai atu mo le avanoa. O lea lava sa taputapu nonofo lava le pepe a le Palemene se i saausi saunoaga a sui usufono matutua o le Maota, aemaise o le matou Komiti o Tupe.

Lau Afioga i le Fofoga Fetalai, i le loto maualalo ou te tulai atu ai e faaogaina lenei avanoa taua se i molimoli atu se leo o si ou itumalo i le Tala Faatatau Faaopoopo Nu.1 o le Tupe 2021/2022. Ou te manatu lau Afioga, o lea ua uma ona faleniu, tofi tofa le laau ma ua fusifusi foi lapalapa o malo ma momoli laau i fogaa aua le Atua ma Lona finagalo aua le faamoemoe o le Palemene i lenei aso.

E manatu o lo outou soifua ma se ola o le puao i le taeao ma le sau i le vaveao e mou atu. O le aputi foi e lelea i le matagi. Ua o se meanoa foi i le silafaga a le Atua. Ae a lenei taeao lau Afioga? Ua le faapena lenei Palemene. Ona malie ai lea i lou gutu upu a Tavita i lona nuu, vivii atu ia outou ia Ieova aua e lelei o Ia, aua e faavavau lava Lona alofa. O le agaga faafetai lea lau Afioga e piiama atu ai i le faafetai siitia i le taimi ua fano.

Ona ou faapai atu lea aua le pau o le Maota nei, i le afio o lau Afioga i le faa-ao o le Palemene o Samoa lau Afioga i le Fofoga Fetalai. O le upu moni ua tumatila Puleono i Salafai, malo le faaeaea. Afio le Sui Fofoga Fetalai ma sui usufono mamalu uma o le Palemene.

Afio lau Afioga i le tausala Palemia, le Taitai o le Malo. Ia, o le upu moni, ua tumatie tamaitai o Samoa i le Pasefika ma le lalolagi atoa. Malo le sailimalo. Afio lau Afioga i le Sui Palemia ma le mamalu i Afioga i Minisita o le Kapeneta, tainane le afio o Sui Minisita.

Afio lau Afioga i le Sui Taitai o le Itu Agai ma sui usufono mamalu uma o le Palemene i lena Itu, tulou, tulouna lava.

E faatalofa atu i lau Susuga i le Failautusi o le Ofisa o le Fono Aoao Faitulafono ma lou soatau le Sui Failautusi ae tainane le Ofisa o le Fono.

E faafeiloai atu foi i Ofisa Sili o Pulega o Matagaluega a le Malo aemaise Pisinisi ma Faalapotopotoga Tumaoti ua tatou faatasi i lenei aoauli. Ia, e faatalofa atu foi i lau Afioga i le Loia Sili lau Afioga Sua, malo le onosai, malo le lavapapale.

E faatalofa faapitoa atu i si ou itumalo o Faasaleleaga 2 i ou tulaga faalupelupeina. Malo le soifua manuia, malo le lagi e mama, malo foi le tapuai.

Ona ou taofi lea lau Afioga, o lea ua osaosa i tumu paia ma mamalu apoapogata o Samoa aua ona paia faale-talalelei, paia faale-Malo ma paia faale-atunuu. Ona ou manatu lea, o sa ma faiga o Samoa mai le taisamasama o le Tuimanua seia paia le taiulaula o Nafanua, o lea ua poto i Tiafau nei, i le malae o le tagamamanu a le atunuu. Ma o le a le toe oo i ai se leo aua o paia ma mamalu e mai le amataga e oo lava i le gataaga.

Lau Afioga i le Fofoga Fetalai, e manatu o le Tala Faaopoopo o le Tupe o le auga lea o le faamoemoe i le aso. Ia, i le aveai ai ma sui o le Komiti o Tupe

Maua ma Tupe Totogi a le Palemene, e fia momoli ai le agaga faafetai i le Taitai o le Malo, lau Afioga i le Tamaitai Palemia mo le amanaiaina o lou faatauvaa. Faafetai tele mo le avanoa e auauna ai i le Malo ma le atunuu aemaise o le Palemene o Samoa e tauala i lenei valaauga faa-Komiti a le Palemene.

Lau Afioga e le fia tuua foi le agaga faafetai i le matou Komiti i le Afioga i le Taitaifono lau Afioga Vaele, malo le fai o le faiva, ua le ole lea. Malo le mataalia. E fia faafetaia foi le Sui Taitaifono o le matou Komiti le Afioga i le Taitai o le Itu Agai aemaise o sui usufono uma o le HRPP o lo o i le matou Komiti, o sui usufono ua leva i le Maota. Ia malo faafetai. Faafetai foi i le agaga lagolago i le tatou galuega ua faigofie ai le tatou galuega.

Lau Afioga i le Fofoga Fetalai, ia o la e faafogafoga mai si ou itumalo. E manatu foi o le tele o nisi manaoga ua uma ona folasia i taimi ua mavae sa fai ai le lauga faataupou. Ia o le a le toe oo i ai se leo i le tele o nisi manaoga o lou itumalo. E manatu foi, ia e le o toe mamao foi Iuni e toe fai ai foi le isi lauga ma toe laulau atu le isi lisi o manaoga o si ou itumalo.

Ae le faaitiitia le agaga faafetai lau Afioga i le Fofoga Fetalai i le Afioga i le Minisita o Galuega, o lea lava ua tatou vaaia ana galuega talu ona tulai mai i si nei taimi puupuu. Ua folasia foi i totonu o le Maota nei lona finagalo vaaimamao mo le atunuu, na ia saunoa ai e le gata lana silasila i totonu o le Maota nei, e le faatalitali foi se i talosaga atu se ua manaomia se laveai. Afai lava ua ia silafia, e tulai lava ma savali e avatu le auunaga e tatau ai.

Lau Afioga i le Fofoga Fetalai, e manatu o le tu lea ma le aga, ma o uiga faa-Keriso lea o lo o manaomia i le taimi lenei e o tatou taitai, e avatu ai le faamalo. O le mea lea lau Afioga i le Minisita o Galuega, faamalo fai o le faiva. Malo le onosai i lau Afioga. E le tau faalata le sui usufono mo Faasaleleaga 2. O lona ua e silafia, e molimau lava mea ua vaaia e mata.

Ia, pei lava ona fai atu o nisi o manaoga o si ou itumalo, o lona ua faailoa atu ma o le a le toe taua.

Ae lau Afioga i le Fofoga Fetalai, e 2 lava nai mataupu taua e fia fesoasoani ai i le Afioga i le Minisita. O le mataupu muamua o le mataupu lea i konekarate moavao lea e moaina le vao i autafa o le auala, tafaala. Lau Afioga se i toe silasila ane lava i ai, e matauina lava i le tele o taimi e le o i ai ni talipupuni foi nei mai le auala. O le popolega lava o le tulaga o le saogalemua o le faafioai ai o le mamalu o le atunuu. Ia, se i toe fautua atu i ai ia i latou o lo o faatinoina lenei lava galuega.

O lona lua, o konekarate foi nei e teuina le auala po o lea e faatutumuina omoomo foi nei se i tulou, o le auala. Ia, e matauina foi o le tele o nisi vaega o le auala e pei foi lele e tele le iliili foi lea e paepae solo i luga o le auala. E matauina i nisi vaega e pei o se pefu foi lele tau ina faatumu ai le... Ia o le vaai lava i le tulaga o le saogalemua, aua e le atoa lava i'a i lo tatou sa e femalagaai ai i lea taimi ma lea taimi, e i ai lava le taimi e tupu ai le

faalavelave i le maseese o le auala aemaise o iliili ia ona afaina ai lea o se soifua.

E pei o nai vaega lautele na e 2 ua tau i ai se manatu, e avatu ai se tuualalo, a o se fesoasoani foi se i toe silasila ane lava i ai i se fautuaga i nai a tatou konekarate ia e nafa ma ia vaega, ona o le tulaga lava o le saogalemu. Ia, lau Afioga i le Fofoga Fetalai, e le toe na ma le laina le tulaga ua i ai si o tatou atunuu ona o le faamai. O le faamalo lava e avatu i le Afioga i le Taitai o le Malo le Afioga i le Palemia ma le Kapeneta, ia ona o tulaga e pei ona i ai le tatou atunuu ma le taumafaiga o le puipuiga o le tatou atunuu mai le pipisi o le faamai, aemaise o le aafia ai o le soifua lautele o le tatou atunuu. E momoli atu ai le agaga faamalo, ia ma le tatalo ina ia i ai le agalelei o le Atua ia maua pea lo outou soifua aemaise ia puipua pea Samoa ma tapuaaoina i Ona aao alofa mai lenei faamai ua oo mai i le tatou atunuu.

E avatu ai foi le faamalo ma le faafetai i tatou aufaigaluega, tatou frontline workers i latou ia e muamua i le faamai, malo lava le onosai, malo le lavapapale. Ia, o le tatalo foi lena a lou sui usufono, ia alofagia e le Atua lo outou soifua ina ia puipui ma malutiaina pea i Ona aao alofa.

Lau Afioga e mata a ae vave, o le upu e fai i le tatou itumalo o Faasaleleaga. Ua uma foi se manatu o le sui usufono mo Faasaleleaga 2. Ae i lenei lava vaiata e faaiu atu ai se lagona, e vaai pea tulaga o feeseeseaiga o tatou manatu ma lagona, ua le gata i le tulaga pei ona i ai lo tatou atunuu, a o tatou talitonuga foi faale-faigamalo. E manatua ai lava i lou loto ma le mafaufau saunoaga a se tasi o one of the founding fathers o le Iunaite Setete o Amerika ia John Dickinson, ia na saunoa ai i upu ia e famous lava, “united we stand, divided we fall.” O le agaga lena o lenei sui usufono, o le tatou loto e tasi, manatu e tasi, mafaufau e tasi, ia, e mafai ai ona tatou tu manumalo, a o lo tatou fevaevaeai ma lo tatou feeseeseai, e faatoilaloina ai tatou.

Ia, ia faasoifuaina le faavae mamalu o Samoa lau Afioga i le Fofoga Fetalai, ae ola le leo o Faasaleleaga. Soifua.

FOFOGA FETALAI: Malo faafetai. Malo lava saunoa i le Afioga i le sui usufono mamalu mai Faasaleleaga 2. Ou te talitonu lava o lea foi ua aumai lau faasoia e tusa ai foi o le Tala Faatatau Faaopoopo o le Tupe, aemaise foi o manaoga o le itumalo. Faafetai o lea foi ua e lagolago mai i le Nofoa ua uma ona e faailoa uma mea uma i lau lauga faa-taupou, a o lea lava ua e fesoasoani i le tatou taimi ma le tatou Fono.

O le mea lea malo saunoa, faafetai foi mo le fautuaga i le tatou Maota ina ia tatou tutu faatasi e manuia ai le tatou galuega.

Ia, o lo o i ai lava taimi totoe o le tatou. O le mea lea, o le avanoa lea lau Afioga i le Taitaifono o le Komiti, o lea e lava le taimi mo lau saunoaga. Ma le faaaloalo.

Afioga VAELE PAIAAUA IONA PAIAAUA SEKUINI (Gagaifomauga 2): Faafetai i lau Afioga i le Fofoga Fetalai o le Maota ua maua se avanoa o lenei usugafono po o lenei foi Komiti e toe lipoti mai ai i le Maota o le Palemene ana galuega, aua o le galuega sa feagai ai i le lauiluina ma le iloiloina o le Tala Faatatau Faaopoopo (Nu.1) o le Tupe 2021/2022.

E piiama ma auai faatasi foi se lagona o lenei usugafono i le taulaga siitia i le taeao ua sola, tatou te sulaina ai pea Le Atua i Lona alofa ma Lona faamaoni ia Samoa, aemaise o le tatou faanonomanu pea ia te Ia, aua ua na o Ia lava o le tatou punimatagi ma lo tatou maluapapa a o tatou i ai i nei vaitau faigata o le tatou folauga.

Lau Afioga i le Fofoga Fetalai, ae ou te le i folasia le Lipoti a le Komiti, ou te manatu o lea ua maea ona lolou mai uluulu o laau tetele o atumauga maualuluga. Ua paia foi atutia o tupua ma malae o le vavau e amata mai lava i le mea e oso ae ai o le la seia oo i le mea e gase i ai lana taamilosaga. Ae mapu ane ia i falematu ma ee i vaatapu le mamalu sausaugata o lenei Palemene, aua e lelepa lava ma le gatete le tauvaa ae see lilia foi le atua o le vasa. A fesili pe aisea? Aua o lele ua soua le lotolau ae lafolafola le tuaau ina ua taalili le igafo o le tanifa. O lele foi ua fotupule le faiva o tama nai le itealemalama, aua ua atoa lio le masina. Ae a lele ua aofaga potopoto faaululuga o itumalo e 51 o Samoa i le malae i Tiafau nei? O le talitonuga o le usugafono lenei, o outou lava o alii o aiga, o lupe na faia mai le fuifui, a o taitai na tofofi mai lagi e fai ma anofale o le fale o Samoa. Fai mai o le anofale e anagata aua e mamananu i le agatausili ma le agaalofo, ae salani ma aui i le faamaoni ma le amiotonu.

Ua paia la ma mamalu le malae i Tiafau nei, aua o le malae o le faautugatagi a Samoa, o le malae e lipoi ai ona upufai o Malo, e faasoasoa ai ma lufilufi ai le tamaoiga ina ia tofutofusia itumalo uma o Samoa ma si ana faalumaga i lea Paeaiga ma lea Paeaiga.

Lau Afioga i le Fofoga Fetalai, ou te muai faatulou i le paia o le Tafatolu Fefaatauaigai o Malo. Ou te faatulou atu i lau Afioga i le Tamaitai Palemia, lau Afioga i le Sao Faapito, lau Afioga Honourable Fiamē Naomi Mataafa Mulinu le II, faapea le paia maualuluga ma le mamalu sausaugata o alii ma tamaitai Minisita o le Kapeneta.

E faatulou atu i lau Afioga i le Faamasino Sili faapea alii ma tamaitai Faamasino ma le Matagaluega o Faamasinoga.

Ou te faatulou atu i lau Afioga i le Fofoga Fetalai faapea sui usufono mamalu uma o le Palemene o Samoa.

Ou te fia faatulou foi i le tapuaiga mamalu a Samoa. E faatulou atu i le afio o lau Afioga i le Ao Mamalu o le Malo o Samoa, lau Afioga i le Tamaaiga lau Afioga i le Tuiaana, lau Afioga Tuimalealiifano Vaaletoa Sualauvi II ma lau Masiofo.

Ou te faatulou atu foi i lau Afioga i le Sui o le Fono a Sui Tofia, lau Afioga Le Mamea Ropati ma lou faletua.

O le paia lava lea aua le afifio o Tama ma Aiga, o Aiga foi ma Tama, le usoga a Pule ma Tumua, Aiga i le Tai ma le Vaa o Fonoti.

E faatulou atu foi i le Motu i Sasae aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, ae tainane Faatuiolomotu, le Laau na Amotasi, Auvaa o Tootoo ua usoalii ma upu ia te oe le Manuatele.

E faatulou atu foi i Taitai o Ekalesia Kerisiano uma i Samoa faapea le nofo a faafeagaiga i so o se fatafaitaulaga i Samoa nei ma Samoa i Sasae.

Lau Afioga i le Fofoga Fetalai, o paia sauoo ma mamalu sautuafafafa na o le falalesee o Samoa, o lo o po pea le fala ma ula le mulila ma tui le mulipapaga, ina ia sao i matau ma ae i malo ou faiva le Palemene o Samoa.

E faatulou atu foi i Ofisa Sili o Pulega o Matagaluega ma Faalapotopotoga Tumaoti a le tatou Malo. Ou te faatulou atu foi i lau Afioga i le Failautusi o le Fono ma le Matagaluega o le Fono Aoaofaitulafono.

Lau Afioga i le Fofoga Fetalai, ou te fia afe ane lava seia ou paia si ou itumalo ma lana tapuaiga.

Si ou itumalo pele Gagaifomauga 2, e mamae lava le tavae i si ona fulu, ae le mafai lava ona faagaloina Afia i si ona vao i lau tapuaiga le ta falelua Safune ma Samauga, aemaise le paia o le afaigaluega tofofi a le Atua o lo o faatunapaulia ma faafalelemalu i totonu o si o tatou itumalo. O paia aua le susu o le Tagaloasusu, afio le alii o le nuu, alaalatai le toafia o Tulafale ma lo la Toalua faapea le mamalu o Safune. Ae tainane le afifio o Sao e Fa ma le Aiga Sa Peseta, faapea le mamalu i le falefa o Samauga. Ia, ou te faamanuia atu le tausaga fou. Faafetai i la outou tatalo ma la outou tapuaiga, a o se taimi mulimuli ane ona ou toe afe atu lea, ae tapuai maia se i fai se tatou sao i le Tala Faatatau Faaopoopo (Nu.1) o le Tupe lea ua taoto i le Laulau a Fono.

Lau Afioga i le Fofoga Fetalai, ae ou te le i oo atu i le Lipoti a le Komiti, ou te fia afe ane lava se i faafetaia le afuaga o lou tulai i lenei tiute o le Taitaifono o le Komiti o Tupe Maua ma Tupe Totogi. E muamua lava ona ou faafetaia lau Afioga i le Tamaitai Palemia i le tofia ai o au e fai ma sui o lenei Komiti. A vaavaai ae i le faatauavaa ma le gaogaaii i se iloa ma se tomai e faatino ai tiute o lenei Komiti, ona lagona lea o le loto maualalo ma le faafetai ae i le Atua, aua o ai le tagata ua manatu mai ai? Faafetai tele lava.

E momoli foi lau faafetai i le Afioga i le Fofoga Fetalai mo le faamalosiua e tapue ai le vaivai ma le taumafai aua le tauaveina o tiute faa-Taitaifono. Faafetai timai, faafetai faalototele.

Ae le itiiti le agaga faafetai e fia faaleo i sui usufono mamalu o lenei Komiti Faa-Palemene. A silasila lau Afioga i sui usufono o lenei Komiti, o sui usufono aupito maoae lava ia o le Maota lenei. Ae i lou tulai mai o se Taitai o le Komiti Faa-Palemene, ou te le mafai le mafai ona faatusaina le mamalu

ma le paia o le Komiti lenei i ni lauia po o nisi lava mea mamate, se i tulou, leai, ou te leai atu. Ae o le Komiti lenei mo le silafia e lau Afioga i le Fofoga Fetalai, o lo o saofafai ai matuaofaiva o faatufugaga eseese, o so o se tomai, aemaise lava tomai i mea tau tupe. O i latou o tulati ma tulatoa o ponao ma tootooau, o faauluuluga o itumalo ma aiga ma afioaga. Ou te momoli lau faafetai tele i la outou faaeaea i le sui usufono mai Gagaifomauga 2 e fai ma Taitaifono o le tatou Komiti. O le upu moni, o tatou uma lava o sui usufono filifilia mai itumalo taitasi, o i tatou e agavaa uma lava i lenei tofiga, a o lea lava ua fai la outou pule ma filifili i lou faatauvaa.

E le faaitiitia lou agaga faafetai tele i le Afioga i le Sui Taitaifono, le Afioga Honourable Tuilaepa Sailele Malielegaoi. E le tau faailoina le sao o lenei tamalii po o lenei tama i le atiaeina o Samoa, ma ua tele foi suiga ua silasila ma maimoa i ai le atunuu a o tu mai i le foe o Samoa i le tele o tausaga. E momoli atu le faafetai tele i lau Afioga i le Sui Taitaifono i lou tamaoiga ua sasaa i totonu o taimi o tatou fonotaga, lea lava ua tapue ma faamalosiaina ai foi lo matou fou mai i le Palemene. E ui ina maua le tino i gasegase, a o le tatalo, ia taulu e le Atua le malosi ia toe faafoisia se laolao lelei e mafai ona toe faatasi ai i a tatou fonotaga.

Lau Afioga i le Fofoga Fetalai, e le gata i le Sui Taitaifono, ae o lo o saofafai ai nisi ua loa le latou tautua i tofiga faa-Minisita e pei o le Afioga ia Honourable Tapunuu Niko Lee Hang, Honourable Sala Fata Pinati, faapea le Tofa ia Lealailepule Rimoni Aiafi.

E faapea foi ona momoli lau faafetai tele i sui usufono o lenei Vaega Faaupufai o lo o matou auai faatasi i lenei Komiti, le Afioga ia Masinalupe Makesi Masinalupe, le Afioga ia Magele Sekati Fiaui, le Afioga ia Faleomavaega Titimaea Tafua ma le Afioga ia Laumatiamanu Ringo Purcell.

Lau Afioga i le Fofoga Fetalai, o lo o atagia i le lotoifale o le Komiti lenei le agaga o le galulue faatasi. Ua vaavaai ma le agaga fiafia, aua o le agaga lea o lo o momoo mai ai le tapuaiga a Samoa, ina ia tafiese le fefulituaai ma le fetuatuanaia a ia galulue faatasi ona taitai e atiae le tamaoiga aua se manuia o Samoa ma ona tagatanuu. Faafetai faafetai tele i le tatou Komiti le galulue.

Lau Afioga i le Fofoga Fetalai, ou te fia faatepa lenei Maota i matafaioi ma tiute o le Komiti lenei o Tupe Maua ma Tupe Totogi. O se tasi lenei o Komiti a le Palemene e tu maualuga ma tumatie foi ona tiute fai. O le Komiti lenei na te lauiluina le iloiloina o tupe maua ma tupe totogi a le tatou Malo, ma e leai lava se sene e tasi o tupe alu ma tupe maua a le Malo e le iloiloina e le Komiti lenei. Ae fautuaina malosi e le Komiti lenei Matagaluega taitasi ma Faalapotopotoga Tumaoti ina ia fuafua tatau galuega talafeagai e faatino e fua i le tamaoiga e maua i lea taimi i lea taimi. E mataituina foi e le Komiti lenei le toe fetuutuunaiga o vaegatupe ua faasaoina, o tupe ua toe fetuunai a Matagaluega mo nisi galuega o lo o fia faatino.

FOFOGA FETALAI: E talu ai o lea ua tatou taunuu i le taimi e muta ai le tatou galuega i lenei aoauli e tusa o le lafo ua faamonia i le Maota.

Ou te vaelupeina ai ma le faaaloalo le saunoaga a lau Afioga i le Taitaifono o le Komiti o Tupe Maua ma Tupe Totogi, lau Afioga i le sui usufono mamalu mo Gagaifomauga Nu 2, o le a maua le avanoa e toe faaauau ai le saunoaga matagofie, pe a tatou toe taliu mai i le itula e 6:00 i le afiafi a nanei.

Ua faamalo saunoa faafetai.

A o le i faataatiaese ia Tualumaga, e taua ia o lenei faasilasilaga. Ou te faasilasila atu mo le silafia e le Maota, ua saunia e le tatou Ofisa le tatou taumafataga o le aoauli, tatou te talisua faatasi ai, a o le i afifio atu le paia o le Palemene.

Ou te faasilasila atu, ua faataatiaese nei Tualumaga a le Fono Aoao Faitulafono, seia aulia le itula e 6:00 i le afiafi a nanei.

Na faataatiaese Tualumaga a le Fono Aoao Faitulafono i le itula e 1:01 i le afiafi seia aulia le itula e 6:00 i le afiafi.